



مدش للأطفال وبس

نسمة عاطف



مش للأطفال وبس

نسمة عاطف

إسلام مجاهد

هبة خليل

2018/13068

978-977-6534-57-5

رباب الشهاوي

هند عبد الله (نور مانجا)

01022897649 - 01126652278

ويمكن طلبه عن طريق موقع جوميا من Elfoad Publishing Marketplace

الكتاب

اسم المؤلف

تصميم الغلاف

تنسيق داخلي

رقم الإيداع

التقييم الدولي

إشراف عام

مديرة النشر

طلب الكتاب



جميع الحقوق محفوظة

للكاتب ودار الفؤاد للنشر والتوزيع، وأي اقتباس أو تقليد أو إعادة طبع أو نشر أي جزء من هذا العمل، سواء إلكترونياً أو فوتوغرافياً أو أي شكل آخر دون تصريح كتابي موثق من الناشر، يعرض مرتكبه للمساءلة القانونية.

هذا الكتاب يحمل رأي ورؤية الكاتب وحده، ولا يمثل الدار أو أي من العاملين بها.

Alfoud_publishing@hotmail.com

facebook.com/foudapublishing



مشن للأطفال وبنس

نسمة عاطف



أرباح الكاتبة كاملة عن هذا العمل تذهب لمستشفى
ابو الريش للأطفال تقديراً لمجهودهم الجبار في علاج
الأطفال



الإهداء

اهداء لأسرتي الصغيرة الي بتكبر ..

ربنا يبارك و يحفظ



مقدمة

لما نزلت النسخة الأولى المبدلجة لفيلم الجميلة والوحش كنت لسه طفلة. على الرغم من إني كان عندي مخزون ضخيم من شرائط توم و جيرى و أفلام أطفال كثير، إلا إن الفيلم ده تحديدًا عشت فيه أيام طويلة. و لغاية قريب كنت بستغرب إني كل ما اسمع موسيقى الفيلم بس تغلبني السعادة و أحس إني طائرة!

مع الوقت اتشكلت الصدمة جوايا لما اكتشفت انه مش الفيلم الوحيد! و مش لأنى شفته و أنا طفلة! أفلام الأنيميشن هي اختياري الأول دايا في أي دار عرض!

و بدأت ألاحظ انه مش غريب بالنسبة لي ألاقى بابا بيتفرج على توم و جيرى أو ماما بتتكلم عن فيلم "البطة السوداء" الي بيحكى عن بطة سوداء مكروهة من كل الي حواليتها لغاية ما بتكتشف إنها بجعة!



الكارتون.. الأنيميشن.... الإنيمي.... عمره ما كان مرتبط بسن. على
العكس، انتم كأهالي المفروض حتى لو مش بتحبوها تشوفوا أولادكم
متعلقين بإيه.

و من هنا تبدأ رحلتنا مع أشهر أفلام الأنيميشن الي قدرت اجمعها.



الفصل الأول

أفلام مأخوذة من كتاب حكايات للأطفال للأخوين جريم



1- سندريلا

" الطير ممكن يحب السمكة... بس قولى هيعيشنوا فين؟

حيث كده... يبقى لازم تلبسي جناحات! "



قصة سندريلا المعروفه البنت اليتيمة الي زوجها أبوها بتستغلها وأمير المملكة الي بيعمل حفلة عشان يختار زوجة والجنية بتطلع تساعدنا وبتروح الحفلة ترقص مع الأمير وبتهرب قبل ما السحريروح فالأمير بيدور عليها في كل حنة لغاية ما بيلاقها في النهاية وبيتجوزها.... وبيعيشوا في تبات و نبات ويخلفوا صبيان وبنات.

هو بعد التفكير في الحكاية ده أعتقد إنى لو أم عمري ما هخلي ولادي يشوفوا النسخ القديمة منها أبدا! القصة دي مبنية على أساس المظاهر وبتري أجيال سطحية وكذابة.... الدليل على كده كالتالي....

أولاً : سندريلا بتعيط عشان تروح حفل الأمير عشان تعجبه... لاحظ هنا أنها أصلا ما تعرفش الأمير غير أنه أمير المملكة! لا تعرف طباعه ولا خصاله ولا إذا كان أمير طيب أو شرير وبيعذب في أهل المملكة! أمير يبقى لازم أتجمل و أروح وأتمنى يشوفني عشان دي فرصة ما تتعوضش.



ثانيا : الجنية لما طلعت و خليتها تروح الحفلة فده بيدي إشارة سلبية للأطفال أنهم ينتظروا معجزات غير واقعيه! سندريلا عيطت و طلعت لها الجنيه! إذا كل مشاكل الأطفال ممكن تتحل بالبكاء!

ثالثا: الأمير بقى هو شخص تافه تماما مستهتر جدا! واحد شاف واحدة أعجب بها لجمالها و قرر يقلب الدنيا عليها.... بغض النظر برضه انه ما يعرفش عنها حاجة ولا يعرف البنت اللي اختارها ده عشان تبقى أميرة و من بعدها ملكة للبلاد شخصيتها عامله إزاي.... شخص أناني تماما مش مقدر قيمة مكانته ولا تأثير قراراته على المملكة اللي هيحكمها!

رابعا: سندريلا دخلت القصر الملكي بفرستان سحري و عربية سحرية وخدم.... وده كذب بين لونها لطفية وضعها في اللحظة دي، وهي خادمة في بيت زوجة أبوها! وقطعا بديهي أن الحفلة في القصر الملكي تبقى للأثرياء و الأمراء و بس. كذب بين!

ديزني أنتجت اكتر من فيلم عن حبكة سندريلا أولها كان عام ١٩٥٠ ومن بعدها تم إنتاج نسخ تانية حاولت بها ديزني تداري العوار الأخلاقي الموجود في القصة الأصلية بأنها تخلي الأمير وسندريلا يتقابلوا قبل الحفلة اكتر من مرة و يعجب بها.... في فيلم ثاني سندريلا اتجوزت عامل في القصر و فضلتة على الأمير.....أما أفضل إنتاج على الإطلاق فكان لفيلم "سندريلا: قصة لا تنتهي ١٩٩٨" بطولة درو باريمور... الي أدي للقصة بعد إنساني منطقي ومفهوم بين لقاءاتها مع الأمير قبل الحفلة و اعتراضها على تصرفاته " الكون قرر يدريك كل السعادة اللي في الدنيا وعلى



الرغم من كده انت ما بتعملش حاجة غير السخرية من اللي ماعندهمش حاجة!" و لحظات التردد اللي مرت بالأمير بعد ما عرف أنها خادمة وسأها وقرر يتجوز أميرة مناسبة ليه لغاية ما راجع نفسه لما حس انه بيعيها وأنها ما خدعتوش!

طيب هل أصل القصة دي ألماني فعلا؟

الحقيقة إن أول توثيق لقصة سندريلا كان من حضارة السبع آلاف سنة في مصر!

القصة باختصار عن رادوبيس البنت اليونانية اللي خلعت ملابسها ونزلت تغتسل في مياه النيل فجده صقر شال ال "صندل " اللي قلعته و طار بيه لغاية ممفيس اللي كان فيها ملك مصر قاعد في الهواء الطلق بيستمع بأشعة الشمس... فجأة رمي الصقر في حجر الملك الصندل ده و طار.

ولان الصقر عند الفراعنة كان مخلوق مقدس " إله حورس"، الملك شاف إن ده أمر الهي بالبحث عن البنت صاحبة الصندل ده والزواج منها ورفعها على عرش مصر. الصندل كان مقاسه صغير وشكله جميل، فخرج جنود الملك يبحثوا عن البنت اللي رجلها هي مقاس الصندل. لقيوا رادوبيس اللي الملك انهر بجمالها واتخذها زوجة بالفعل!

القصة دي بعدها تم كتابتها في الحضارة الرومانية بتفاصيل مختلفة... ظهرت في الحضارة الآسيوية....و ظهرت برضه في ألف ليلة وليلة! النسخة الفرنسية كتبها كاتب اسمه تشارلز بيرلوت هو اللي أضاف ليا الجنية و العربية السحرية اللي أصلها قرع عسلي!



كل التاريخ ده مش هينفي إن القصة اشتهرت لما الأخوين جريم وثقوها ضمن القصص الشعبية اللي كانوا بيجمعوها في قصص الأطفال! مشكلة القصة المكتوبة في كتاب جريم أنها كانت – ككل القصص - عنيفة جدا! في القصة واحدة من أخوات سندريلا بتقطع صوابع رجلها عشان الجزمة تبقى مقاسها و الأخت الثانية بتقطع كعب رجلها..... في النهاية لما الأمير بيعرف فين سندريلا و بيتجوزها سندريلا ماكانتش طيبة والجوده..... دي انتقمت منهم شر انتقام!

الإضافات كتيرة فضلت تتزايد على القصة دي و اتشال منها أجزاء كتير لغاية ما قامت ديزني في الخمسينات بخلق شخصيات الحيوانات اللي بتحب سندريلا و بتحولهم الجنية لسائق العربّة السحرية و تابعين. اتفرجوا مع أولادكم على فيلم سندريلا بس يا ريت تكون النسخ الحديثة " لأنها أكثر منطقية و لأن القديمة مبنية على المظاهر الخداعة " و بعدها ممكن تحكوا لهم عن رادوبيس... أصل قصة سندريلا.



2 - الجميلة والوحش "Beauty & the Beast"

" لو هي فعلا اللبي هتقدم تكسر اللعنة... يبقى لازم تتعلم إزاي تحبها! "



القصة باختصار وحش ملعون وأب
بيقع تحت رحمته فا بتقرر بنته تاخذ
مكانه كرهينة الوحش. لعنة الوحش
أن واحدة تحبه و هو شكله كده
عشان تنفك شبه مستحيل.... وده
طبعاً لأنه سخر من شكل ساحرة.

كوحش مربع صعب أن واحدة
تحبه. مع الوقت طباعه بقت صعبة

جدا لدرجة انه ما بقاش يتحكم في أعصابه و كل الخدم اللي عنده في
القصر اللي اتلعنوا معاه بيخافوا منه جدا إلا هي! مع الوقت بتشوف
حقيقته و بتحبه بغض النظر عن شكله... و بتكون السبب في أن اللعنة
تنفك و يرجع أمير وسيم تاني.

على عكس سندريلا القصة هنا كلها قيم أخلاقية. البنت اللي بتحب أبوها
جدا و عندها استعداد تضحي بنفسها عشانه. الأمير اللي مجرد سخريته من
شكل واحدة اتلعن و اتعاقب.... بيل الجميلة اللي ما همهاش شكل الوحش و
لا هو عنده إيه و حبه زي ما هو (لاحظ طول القصة هي ما تعرفش انه
أمير أو عنده منصب أو ثري) في نهاية القصة دي بتكتشف حقيقة أن الحب
بيعمل المعجزات.

القصة فرنسية الأصل اُكتُبت في القرن السادس عشر، مافيش اختلاف في التفاصيل غير إن الأب في بداية القصة كان عنده ثلاث بنات اتنين وحشين و بنت جميلة و كانوا بيغيروا منها ولما وقع في الأسر البنت الجميلة الطيبة هي اللي قررت تفدي أبوها.

في نظرية خرجت بتقول إن القصة حقيقية تماما لكن الموضوع مش وحش مسحور و ملعون و قلعة. الموضوع و ما فيه صورة قديمة مرسومة سنة ١٥٨٠ لشخص اسمه بيدرو جونزاليز... الشخص ده كان اسمه " رجل الغابة" جونزاليز كان مصاب بمرض نادرو هو " هايبر تريكوسس " و هو مرض يتسبب وجود الشعر بشكل مبالغ فيه و يغطي جسم الإنسان بالكامل لدرجة انه يصبح الوحش " من وجهة نظر المحيطين بيه في الوقت ده طبعاً " الراجل ده تم إهداؤه للملك هنري الثامن ملك فرنسا و فضل في البلاط الملكي لغاية ما الملكة قررت كنوع من كسر الروتين إنها تجوزه عشان تتسلي شوية. و اختارت بنت من عيلة ارسقراطية مكانش لها الحق في رفض الجوازة دي. البنت لما شافت بيدرو أول مرة وقعت من طولها من الصدمة والرعب.

الأيام اللي تلت الجوازة كانت صادمة للملكة لأنها اكتشفت إن البنت اتعلقت ببيدرو لحنيته و كرم أخلاقه. البنت دي حملت من بيدرو و كل مرة الملكة بتنظر البنت تخلف لها وحوش صغيرين يملوا عليها القصر لكن الصدمة إن البنت خلقت أطفال طبيعيين مش وارثين مرض أبوهم. بعدها خلقت ولد و بنت حاملين المرض و الملكة فرحت بيهم جدا. و أخذتهم من أمهم و أبوهم أهدتهم لاتنين من أصدقائها المقربين، في تصرف يوضح مين صاحب التصرفات السوية و قدر يخلي واحدة تحبه و مين وحش ادمي بوش حلوو مركز مرموق حرم أم من عيالها كنوع من الترفيه!



قصة الجميلة و الوحش ظهر لها صدي في الطب النفسي....في متلازمة اسمها (white knight syndrome) بتصيب الرجال و الستات على حد سواء يس مع الستات بتاخذ منحى أعمق .الفكرة أن الست المصابة بالمتلازمة دي بتبحث عن (الوحش) على أمل انه يتحول على إيديها لأمير! تلاقي الواحدة من دول منجذبة لشخص مدمن أو فاشل أو وقح أو شرير وجواها يقين أن الحب هيعمل المعجزة و أنها هتقدر تفك السحر و تغيره .بتكون النتيجة طبعا انه ما بيتغيرش !على العكس اللي بيحصل - على الأغلب - انه يا يبجرها معاه لاختطؤه يا بيؤذيها و يكسر قلبها..... المشكلة هنا إن الست المصابة بالمتلازمة دي بتتخيل بعد كذا تجربة من دي أنها بتجذب شخصيات غلط لحياتها...ما بتستوعبش أنها هي اللي بتنجذب للنوعيات دي!

الفكرة أن في القصة الخيالية (الوحش) كان كاره إنه وحش و عايز يتغير.... بيعمل المستحيل عشان يتغير و يرجع أمير... و ده اللي ساعده في أن اللعنة تتكسرو بيل تحبه .لكن لو (الوحش) مش حاسس انه عنده مشكلة أو مش فارق معاه يبقى في الحالة دي مستحيل يكسر لعنته و هيفضل وحش!

أول إنتاج للفيلم ده كان سنة ١٩٩١ و من عظمة الفيلم ده نال أوسكار أفضل فيلم..... طبعا الفيلم مميز جدا بأغانيه اللي غنت فيهم النجمة سيلين ديون أغنية " tale as old as time " النسخة الثانية من الفيلم تم إنتاجها سنة ٢٠١٧ بطولة ايما واطسون....النسخة الأولى أفضل... الحقيقة إن دبلجة النسخة القديمة باللكنة المصرية كان اكتر من رائع و عايش في ذاكرة كل اللي شافه، خصوصا بالقفشات المصرية و الاحكام في اختيار كلمات الأغاني " عشوه ايش... عشوه ايش"...و" من عمر الأيام ".



في النهاية..... اتفرجوا على الجميلة والوحش وتكلموا مع أولادكم كثير....
إن الوحش كان رافض اللعنة و اتغير فعلا بدليل انه فضّل إن بيل ترجع
لأبوها على الرغم انه بيعمها..... مش بس قال انه عايز يتغير وما بذلش أي
مجهود عشان يرجع إنسان ثاني!



3 - الجمل النائم " Sleeping Beauty "

" و ما فينك يوم هيعدي... مثل هتوحنلني فيه ابتسامتك "

القصة تقليدية نوعا... الأميرة اللي في ساحرة بتلعنها و هي طفلة عشان الملك

و الملكة أهلها ما وجهوش دعوة

للساحرة. الساحرة بتلعن الطفلة

أنها لما تتم ١٦ سنة تنام نوم طويل

زي الغيبوبة ما تصحاش منه غير

على قبلة حب حقيقي .



طبعا اللعنة بتتم زي الساحرة ما قالتها بالظبط.... وبعدين بيعدي أمير يلاقي

بنت جميلة نائمة فبيحبها وبيقبلها... فبتفوق.... ويعيشوا في تبات و نبات....

طبعا استمرار السطحية في القصص الخيالية كان غير مبرر نهائي. تخيل

واحد حب واحدة حب حقيقي لمجرد أن شكلها حلو و هي نائمة! كنت دائما

بحس إن الأميرة دي لاقت حب حياتها من غير ما تقوم من على السرير! يعني

واحدة بتاخذ جايزة على إنها نائمة!

في نظرية بتقول أن فكرة الحب من أول نظرة اللي مسيطرة على قصص

جريم اللي متاخذ منها الأفلام دي راجع لأن القصص دي قصص شعبية من

القرون الوسطى. أوروبا وقتها ما كانش في بالنسبة للناس مفهوم للنظافة

الشخصية نهائي.و بالتالي الشخص الي كان بيشوف بنت وشها نضيف كان
بيقع في حبها!

أول نسخة من الفيلم تم إنتاجها سنة ١٩٥٩...أفضل إعادة للقصة دي هي
مالفيسنت سنة ٢٠١٤ قدمتها النجمة انجلينا جولي. بتحكي قصة الساحرة
الشريرة من منظور مختلف - و ده بقى اتجاه في الأفلام بالمناسبة بيدي
الشخصيات ثقل لأنه في الواقع مافيش حد شرير للشر. الساحرة بتلعن
الأميرة، وعشان تتأكد أن انتقامها هيتحقق بتفضل تراقبها بتكبر يوم بعد
يوم لغاية ما بتحصل مشكلة أكبر من اللعنة .

الساحرة بتتعلق بالأميرة وبتحبها كأنها أم لها - لاحظ هنا أنها عمليا ربتها و
حمتها من الموت عشان انتقامها يكتمل لما تكبر- في النهاية اللعنة بتتحقق .
بتحاول الساحرة تجيب الأمير الوسيم يقبل الأميرة إلا أن المفاجأة أنها ما
بتفوقش! وقتها بتتوجع الساحرة أكثر لأن القصد من لعنتها أنها ما تتفكش
أبدا...لأن مافيش حب حقيقي في الدنيا .بتقبل رأس الأميرة بحزن... فالأميرة
بتفوق.

هنا الوضع يبقى منطقي و مفهوم.... الحب الحقيقي الصادق الي ما
بيتغيرش.... الحب غير المشروط هو حب الأم لأبنائها...

يقال إن القصة فرنسية الأصل بتتكلم عن أميرة بتحب شاب عادي وأبوها
الملك بيطلب منه مهام تعجيزية عشان يثبت انه جدير بها. بيودع الشاب
الأميرة وبيسافر لكنه بيكون ترك معاها تذكار.... الأميرة بتكون حامل!



بعد ما بتولد طفل بتدخل في غيبوبة ما بتفوقش منها غير بعودة الشاب بعد
ما حقق كل المهام المطلوبة منه. و لما بيلاقي الأميرة نايمة بيبيكي عليها و
بيصمم انه يضع خاتم الزواج في إيديها... هنا بتفتح عينيها!

البعض ارجع الحكاية دي لقصة كانت الكنيسة الأوروبية بتنشرها كنوع من
التوعية للبنات من العلاقات بره إطار الزواج. و الدليل إن الأميرة فاقت أول
ما بقت علاقتها بالشاب في إطار صحيح (وضع الخاتم في إيديها!)

اتفرجي مع أولادك على مالفيسنت.... بعد الفيلم خديهم في حضنك و بوسي
رأسهم.... حسسهم أن الساحرة الشريرة اللي طول اليوم بتزعق و بتشد
شعرها عشان يذاكروا ولا يبعدوا عن الشباك ولا ما يرموش هدومهم على
الأرض ولا ياكلوا ولا يبطلوا ضرب في أخوهم الصغير ولا ولا ولا..... جواها
أم بتحيم حب حقيقي عمره ما هيتغير.... حب غير مشروط



"4-روبنزل" *"Rapunzel"*

”أنا قدرت أثق فيك!

ده فعلاً.... قراء سيء! "



قصة روبنزل بتحكي عن أميرة بتخطفها ساحرة شريرة عشان شعرها فيه قوة سحرية. بتحبسها في قلعة كبيرة مالهش أبواب وبتستخدم شعرها عشان تطلع و تنزل بيه. روبنزل بتقعد تغني و تبكي في القلعة لغاية ما بيعي أمير يسمعها و يحبها من أول نظرة " برضه " و بيقتل الساحرة و ينقذها.

النسخة دي كانت إنتاج الخمسينات...طبعا بعد مرور الوقت ديزني حبت تنزل نسخة جديدة و مع تفاهة النسخة القديمة تم إنتاج

"Tangled 2010"

النسخة دي بتتكلم عن انه مافيش أمير ده حرامي! اه حرامي! النسخة بتسخر من سداجة روبنزل و إزاي هي بسرعة وثقت في الحرامي ده - هو نفسه بيسخر منها عشان وثقت فيه - و إزاي إن مصير روبنزل متغيرش غير لما هي وقفت وأخذت موقف عشان تدافع عن نفسها.



رغم إن الأخوين جريم أكدوا إن القصة أصلها ألماني إلا أنه بالبحث فالقصة أصلها فارسي! و هي قصة تم سردها بشكل شعري في الشهامة " الفلكلور الفارسي ".... قصة رودابة.

القصة باختصار عن الأميرة رودابة اللي كانت عايشة في قصر عالي.. بيعجب بيها شاب و هي بتعجب بيه و لما بيروح لها بيطلب منها تنزل له شعرها عشان يطلع لها. الكلام ده طبعا بشكل شعري عشان يوصف مدي جمال رودابة... رودابة في الواقع بتزله فروع الشجر وبيتسلق عليها لغاية ما بيوصل لها. البعض برضه ربط قصة روبنزل بقصة القديسة باربرا اللي أعلنت انتمائها للمسيحية فما كان من أبوها إلا انه حكم عليها بالسجن في برج قلعة.

أيا كان أصل قصة روبنزل فهي قصة مسلية فعلا... و أفضل نسخة منها هي إنتاج ٢٠١٠ اللي بتتكلم عن روبنزل اللي وقفت وقررت تغير واقع السجن اللي عاشت فيه و ما انتظرتش أمير ينقذها... لا هي اللي أنقذته.

بعيدا عن الفيلم وقصة جريم روبنزل ممكن تكون بتعكس علاقة مرضية بين " الأم / الأب و أبنائهم "

في مرض نفسي اسمه " عقدة الآباء الاتكاليين / Codependent "Parents" و دي بتكون الأم / الأب مسيطرين على كل كبيرة و صغيرة في حياة ولادهم و ما بيسمحوش لهم حتى برفاهية الاختيار. العقدة دي بتظهر في الأمهات بشكل اكتر و سموها " الأم المسممة " بكسر الميم!.....موجودة في الآباء بنسبة اقل.



الطفل هنا للأسف بيكبر وهو بيعاني من أعراض " متلازمة ستكهولم ". هو عارف انه غلط تفضل أمه مسيطرة عليه كده وفي نفس الوقت حياته من غيرها حرفيا واقفة! ما بيعرفش يفكر أو يتحرك و بيعس بذنب بشع لو أعلن عن رأي مختلف عن رأي الأم لأنها من وجهة نظره بتحميه!

مشكلة الأم المسيطرة دي أنها ممكن تخرج طفل مصاب بعقدة أوديب! أوديب للي ما يعرفش هو أسطورة باختصار بتحي عن شاب قتل أبوه و اتجوز أمه، طبعا من غير ما يعرف إن ليه علاقة بهم. " للأسف نسبة كبيرة من السفاحين على مستوى العالم كانوا بيعانوا من العقدة دي " المشكلة الأكبر بقى لو الموضوع تطور مع الأم نفسها ونمى عندها عقدة " جوكاستا!" جوكاستا للي ما يعرفهاش هي أم أوديب! طبعا اللي بيتخيل إن كل الكلام ده مستحيل يحصل في الواقع للأسف في حالات كتير وموثقة! ومنهم حالات في الشرق الأوسط وفي مصر كمان!

بالنسبة للأباء بقى الموضوع بيكون تحكم برضه. وتمسك شديد بالبنات تحديدًا.....وده ممكن يوصل الموضوع لعقدة " الكترا "...الكترا باختصار بنت قتلت أمها وعشيق أمها عشان تنتقم لأبوها.

الساحرة الموجودة في القصة هنا مش شرط تكون غريبة. ممكن للأسف الشديد تكون هي الأم أو الأب اللي حابسين ولادهم في قلعة مقفولة ومتحصنة ويوصلوا الأولاد إن السبيل الوحيد للخروج من القلعة ده إنهم - الأب أو الأم - يموتوا! في الفيلم روبنزل عاشت سعيدة... في الواقع للأسف الأطفال بتعيش مشوهة نفسيا وغير متزنة.



5 - بياض الثلج "Snow white"

" و افتكري دايمًا انك الوحيدة اللي تقدرى تنوري العالم! "



القصة دي برضه خارجة من كتاب الأخوين جريم بتحكي

عن الملكة اللي بتتمنى تخلف بنت في بياض الثلج.

بتخلفها فعلا لكن بتموت بعدها. الملك بيتجوز واحدة

حلوة جدا إلا أنها ساحرة عندها مرآة سحرية وكل يوم

تقف قدامها وتسأل إذا كان في واحدة أجمل منها في الدنيا.... والمرآة بتقول

لها لا. يوم بعد يوم سنوايت بتكبر ولما بتوصل ١٦ سنة المرآة بتحذر الملكة

إن سنوايت بقت أحلى منها.

الملكة بتتجنن و بتأجر حارس يقتل سنوايت. الحارس ده بياخد سنوايت

للغابة بس ما بيقدرش يقتلها - مش فاهمة إيه إرهاب المشاعر اللي جاله

فجأة ده - وبعدها بيقتل حيوان وياخد قلبه ويرجع بيه للملكة على أساس

إن ده قلب سنوايت وياخد المكافأة ويخلع.

سنوايت بتدخل بيت أقزام بيشتغلوا عمال محاجر. بعد مداولات

بيوافقوا إنها تعيش معاهم. الساحرة بتكتشف إن سنوايت لسه عايشة

فبتتنكر وتديها تفاحة مسمومة وسنوايت بتدخل في غيبوبة. الأقزام من



الحزن عليها بيحطوها في تابوت ازاز... بيحي أمير يشوفها وهي نائمة يعجب
بيها بيبوسها تفوق! والساحرة بتكسر المراية فبتموت!

طبعا القصة ده فيها كمية انبهارات علّت على كل اللي فات. مبتقدرش تفهم
طب فبن الملك هنا؟ الحج صاحب البيت ما سألش إيه اللي خلى بنته تتأخر
في الغابة لبعد الساعة ١٢ لا وتبات كام يوم كمان!

بالنسبة لسنو وايت اللي دخلت بيت غريب فيه سبع أقزام و باتت فيه
عادي! لا وعاشت معاهم عادي! يعني إيه الثقة الرهيبة في ناس عمرها ما
شافتهم قبل كده ده؟ إذا كانت زوجة أبوها اللي عاشت معاها سنين كأنها
أم لها حاولت تقتلها!

طب سنو وايت لما الحارس هربها ما حاولتش تتواصل مع أبوها الملك ليه؟
يعني حبت حياة الغابة مثلا؟ إيه كمية الضعف وقلة الحيلة دي؟

فوق كل ده لازم طبعا الأمير اللي حب البنات من أول نظرة وباسها ففاقت!
بجانب سطحية الفكرة فهي أصلا بترسخ لمبدأ الأميرة اللي منتظرة حد
ينقذها!

طب في أصل للقصة اللي تنقذ دي؟

القصة الألمانية الأصل طبعا جمعها الأخوين جريم من الحكايات
الشعبية. لكن في دراسات بتقول إن أصلها يرجع للكونتيسة الألمانية "
مارجريت فون فالديك"



الحكاية إن زوجة أبو الكونتيسة دي كانت بتكرهها جدا وفضلت تزن على زوجها لغاية ما أبعد بنته لقلعة بعيدة. البنت كبرت وفي سن ال ١٦ شافها أمير اسباني وحيا وكان عايز يتجوزها " الأمير ده أصبح الملك فيليب الثاني ملك اسبانيا فيما بعد " الأب رفض لأسباب سياسية لكن الكونتيسة أرسلت لوالدها عشان تطلب منه يعيد النظر في الرفض!

الأب شعر ان بنته بتحب الأمير فصمم على الرفض وطلب من الأمير عدم التواصل مع بنته.... الكونتيسة اللي ماتت بعدها بشكل " غامض "! البعض طبعا نسج قصص حولين موت الأميرة دي إن أبوها أمر بقتلها خوفا من أنها تهرب مع عشيقها وتسبب له فضيحة سياسية!

طبعا القصة ده اتحورت لغاية ما نقلها الأخوين جريم في كتابهم... الكتاب اللي القصة فيه مكانتش سنوايت بالبراءة دي لا ده لما فاقت من الغيبوبة تعاونت مع الأمير على الانتقال من الساحرة وحرقوها حية! بس طبعا لأنها قصة أطفال فضلت تتحور لغاية ما سنة ١٩١٢ اتعملت مسرحية غنائية وتم إعطاء الأقرام اللي فيها شخصيات مختلفة بعد ما كانت شخصياتهم كلها تقريبا لها رد فعل واحد كأنهم آلات!

بعدها شركة والت ديزني أنتجت الفيلم وادت كل قزم فيهم اسم مختلف مع اختلاف الشخصية. توالى بعدها إنتاج ديزني للقصة ظهرت فيه سنوايت شخصية قوية. في إنتاج ثاني للقصة اقرب للعنف ما انصحش بيه للأطفال. في النهاية... سنوايت قصة أطفال ممتعة لكن فيها للأسف رسائل كثير سيئة....حاولوا تنتقدوها قدامهم عشان تلفتوا نظرهم ليها.



6- الأميرة و الضفدع

"Princess and the Frog "

" الطريقة الوحيدة عشان ناخذ بيها اللي انت عايزه في الدنيا ده.....هي انك تشغل بكل طاقتك!"

العكس بتاع قصة الجميلة والوحش.



أميرة جميلة عندها كل شيء في الدنيا مغرورة ومتغترسة بتلاقي نفسها مجبرة تتعامل ليل نهار مع ضفدع بأمر من والدها. الضفدع المقزز يباكل معاها في نفس المكان و ينام على نفس السرير ويروح معاها في كل حطة. في الآخر بتزهق منه وبتحاول تتخلص منه بيقع كأنه ميت.

بتحزن عليه بشدة و بتندم على تصرفاتها معاه وبتبكي لغاية ما بيفوق و بتبوسه فيصبح أمير. وبتنتهي القصة نهاية سعيدة.

زي ما قلت في البداية القصة دي عكس الجميلة والوحش حيث إن المغرور هنا هي البنت نفسها و الملعون اتعلم بالدرس بالفعل. بيرق قلبها ليه لما بتأذيه. على الرغم إن القصة ده فيها قيم أخلاقية عالية زي إننا ما نقللش من حجم أي شيء حتى لو ضفدع لأنه ممكن يكون أمير ومبحكمش على حد



بالظاهر إلا إن فيه جزء غاية في الخطورة وهو شعور الأميرة بالذنب وحبها للضفدع لما أذته.

الموضوع للأسف ممكن يكون راجع لإحساس الأميرة بالذنب لأنها تسببت في أذى مباشر بمعاملتها السيئة للضفدع ده وكمان تسببها في مرضه. جميل إن الشخص يحس بالذنب لو اخطأ لكن الدخول في علاقة قوامها الإحساس بالذنب غير صحي بالمرّة.

أصل القصة مش معروف تماما. البعض بيرجح إنها قصة خيالية من العهد الروماني. و اللي بيدعم النظرية دي إن القصة موجودة بأكثر من شكل في الحضارات الأوروبية.

ديزني أنتجت القصة دي بشكل حديث سنة ٢٠٠٩ وكانت مختلفة كتير عن القصة الأصلية " لحسن الحظ". كانت البطلة سمراء اللون واسمها تانيا. طبعا ديزني أضافت كتير للقصة وعملت فيلم بيتفادى أخطاء القصة الأصلية.



7- هامل و جريتيل "Hansel and Gretel"

" ساعتها هتنتوف فتات العيش وهيكون دليلنا عنتان نرجع البيت "



مش بتفاجئ إطلاقا إن قصة هانزل وجريتيل هي قصة أطفال في كتاب جريم. لأن تقريبا كل قصص الأطفال في كتاب جريم كانت عنيفة جدا ودموية.

أنا بتفاجئ من استقبال الأطفال لها بشكل رحب!

القصة الأصلية بتتكلم عن أب غير قادر على انه يصرف على أولاده فبيضطر يتخلص منهم في الغابة. الأولاد هم بنت وولد..... البنت ذكية بترمي فتافيت عيش على الأرض عشان ما تفقدش الطريق للبيت. للأسف الطيور اللي في الغابة بتاكل بقايا العيش ده فالبنت و الولد بيتوهوا. بيوصلوا لبيت مصنوع من البسكوت. لما بيدخلوه بيلاقوا فيه ساحرة شريرة بتحتجزهم. بعد فترة احتجاز طويلة _على أمل إن الأولاد يتخنوا والساحرة تاكلمهم_ بيقدروا يخدعوها ويبرموها في الفرن و يتموت محروقة. و يرجعوا لبيت أهلهم سعداء مسرورين!

مش هتكلم طبعاً عن الرعب اللي المفروض أي طفل طبيعي يعاني منه لما يسمع القصة دي! يعني الأب والأم بيعانوا من ضيق الحال فبيضطروا يتخلصوا منهم! ولا هتكلم عن قصة ما هي إلا سرد لحادثة أكل لحوم بشر من ناحية الساحرة! ولا هتكلم عن طريقة قتل الساحرة البشعة اللي هي للأسف دفاع شرعي عن النفس! ولا هتكلم عن الأب والأم اللي فرحوا برجوع عيالهم " اللي هو ما تسألنيش إزاي!" اللي هتكلم عنه النقطة الوحيدة الإيجابية في القصة ده هي ذكاء الأطفال وحيهم لبعض وقدرتهم على التلاعب بالساحرة وقلب موازين الأمور لصالحهم. على الرغم إن النقطة دي إيجابية تماماً في حاله الخطر إلا أنها بتفتح المجال للأطفال بالتلاعب بالكبار عموماً - على سبيل التسلية مثلاً - وده شيء هيكون صعب السيطرة عليه.

أول إنتاج للقصة كان سنة ١٩٣٢ من شركة ديزني والفيلم كان اسمه "أبناء الغابة" بعدها توالى النسخ.

مرة ثانية أصل القصة غير معروف لكنه على الأرجح انجليزي بيرجع لفترة كساد في إنجلترا في القرن الرابع عشر. مافيش تفاصيل معينة بخصوص القصة دي غير اللي مكتوب في كتاب جريم.

ما انصحش بمشاهدة أي فيلم عن قصة هانزل و جريتل للأطفال.



8- ذات الرداء الأحمر

"Little Red Ridding Hood "



" عينيكي كبيرة قوي يا جدتي...

عنتان أنثوفاك بيهميا حبييتي...

وودانك كبيرة قوي يا جدتي...

عنتان اسمعك بيهميا حبييتي...

وسنانك ده كبيرة قوي يا جدتي....

عنتان أكلك بيهميا حبييتي! "

بتخرج بنت صغيرة متجهة لبيت جدتها المريضة وهي شايلة في إيديها سلة أكل ولابسة " رداء احمر ". في البداية البنت قررت تاخذ طريق الغابة اللي أصلا متحرم عليها تاخده. بس مشيت منه وقابلت الذئب اللي كلمها وردت عليه و عرف منها رايحة فين ولين وفي الآخر سبقها على بيت الجدة وأكلها و تنكر في شكل الجدة عشان ياكل البنت هي كمان. لولا وجود صياد بالقرب من بيت الجدة سمع استغاثة البنت وجري لحقها و فتحوا بطن الذئب بالسكينة عشان يطلعوا الجدة منها.



في البداية كده خلونا نعترف إن القصة ده قرصة ودن على الهادي كده لأي طفل يتفرج عليها... كالتالي..

أولاً... البنت ما سمعتش كلام أمها ومشيت من طريق غير اللي قالت لها عليه.

ثانياً... قابلت كائن غريب ردت عليه رغم إنها مش مسموح لها تكلم أغراب. ادته معلومات كاملة عن حياتها واتجاهها وده تسبب في انه أكل الجدة. ده غير الهلع اللي طبعاً مرت بيه و هي قاعدة جمبه على انه جدتها وفجأة اكتشفت انه الذئب!

الحكاية دي تحس إنها مرسومة تحديداً بالورقة والقلم كدرس توعية للأطفال.... ما تمشوش غير في المكان اللي حدده أهلكم..... ما تكلموش أغراب وإن كلمتهم ما تعطوهمش أي معلومة عن حياتكم.

أصل القصة على الأرجح إيطالي لأنها أول قصة مكتوبة قبل توثيق الأخوين جريم لها كانت إيطالية تحت اسم " الجدة المخادعة " زي ما قلنا القصة مالهاش أصل تاريخي غير إنها حكاية الهدف منها تخويف الأطفال. طبعاً قبل جريم كانت القصة موجودة في أكثر من حضارة أوروبية مع استبدال الذئب ب.. غول.... ساحرة... مصاص دماء... أي كائن مرعب بحيث إن الأطفال تخاف من الكلام مع الأغراب.

في انعكاس للقصة ده على الواقع الذئب بقى الشاب اللي أي أب أو أم بيخافوا بنتهم المراهقة تكلمه. طبعاً هو يبقى ذئب حقيقي. نموذج الشاب



الوسيم الوقح جذاب جدا في سن المراهقة للأسف. عشان كده القصة ده تصلح لتحذير لكل الأعمار.

أول إنتاج للقصة دي من شركة ديزني كان سنة ١٩٢٢ و بعدها توالى النسخ من نفس القصة. فيهم نسخة اكتر من رائعة إلا أنها لا تصلح للمشاهدة الأسرية إنتاج سنة ٢٠١١ بطولة اماندا سيفريد و جاري أولدمان. الفيلم ده فيه شرح لإزاي الرعب من الذئب ممكن يوصل الناس إنها تباع اقرب الناس لها وإن الأنظمة القمعية بتستخدم الخوف من الذئب لإحكام سيطرتهم وإخراج العقد النفسية على الناس الغلبة لكن في النهاية مهما بلغ جبروتها دائما بيكون جزائها من جنس العمل.

في نسخ أقدم إنتاج ٢٠٠٦ وفيما قبل شوفوها مع أولادكم.....و خليم يتعلموا الدرس من الفيلم.



الفصل الثاني...

في الفصل ده هنتكلم عن أفلام الأطفال اللي مش مأخوذة عن
قصص الأخوين جريم . بعضها اتكتب قصص أطفال عادية
واتحول لأفلام والبعض الآخر اتكتب مخصوص للسينما



1- فروزن Frozen

" اولاف ! انت بتدوب !

في ناس تستحق إننا ندوب عشانها ! "

عن قصة شعبية ألمانية اسمها " ملكة الثلج "

تم إنتاج فيلم فروزن.



قصة الفيلم عن الأميرة اللي عندها قدرة خارقة بتخلها تتحكم في الثلج. و أختها الطفلة المندفعة اللي بتحب الدنيا والحياة. الأميرة ايلسا

بتعيش طول حياتها في خوف من إن الناس تكتشف حقيقة القدرة اللي عندها. لغاية ما الناس بتكتشفها غصب عنها و بتضطر تواجه العالم بالقدرة دي. الأميرة الصغيرة المندفعة هي اللي بتقدر تخلي أختها تتحكم في القدرة دي عن طريق الحاجة الوحيدة الثابتة- و النادرة- في الدنيا دي.... الحب غير المشروط.

الفيلم ده تحديدًا كان فيه كمية رسائل كتيرة صدم الجمهور بيها وغير قواعد كانت بتبني من سنين....

أولاً...الخوف و محاولة التواري والاختفاء عن الناس عمرها ما كانت أو

هتكون حاجة صح على العكس عواقبها بتكون وخيمة جدا.

ثانياً...لازم تواجه العالم بكل ما فيك خصوصا لو الي انت بتحاول تداريه

ده عيب انت مش متسبب فيه.

ثالثاً...الي انت بتشوفه عيب ومصيبة ممكن يكون الحاجة الي بتميزك

الي تقدر تفيد الناس بيها.

رابعاً...الفيلم ده ضرب نظرية الحب من أول نظرة في مقتل. بداية من

اعتراض الملكة ايلسا على جواز أختها " ما ينفعش تتجوزي حد

انت لسه مقابلاه!" مرورا بسخرية كريستوف منها و سؤاله ل " أنا

" عن التصرفات المقززة الي بيعملها هانز و رد " أنا " انه

مستحيل يكون بيعمل كده لأنه أمير!

خامساً...الأمير مش شرط يكون شخص نبيل! دي ثاني أسطورة يدمرها

الفيلم ده. الأمير ممكن يكون شخص انتهازي و خبيث عادي جدا!

المستوى الاجتماعي مش انعكاس للأخلاق خالص.

سادساً...مره ثانية في اتجاه الأفلام العائلية الحب الي بيبغير اللعنات هو

الحب الأسري غير المشروط. شفناها في " مالفيسنت " لما تم

استبدال " قبلة الحب غير المشروط " من الأمير للجنية الي ربت

الأميرة كأنها بنتها....هنا كان الحاجة الوحيدة القادرة على كسر

اللعنة هو حب الأخت.



الفيلم ده اكر من رائع و من الأفلام اللي انت كأب أو أم تقدر تسبب أولادك يتفرجوا عليه و انت واثق إن المعاني اللي هتثبت في عقلم منه هي المعاني الصح. بس خلونا نشوف كام معلومة مميزة عن إنتاج الفيلم ده.

١- الفيلم مأخوذ عن قصة أطفال ألمانية اسمها ملكة الجليد و ده كان

الاسم الأصلي للفيلم قبل Frozen

٢- شخصية أولاف ما كانتش موجودة في السيناريو المبدئي بس بعد رسم

الاسكتشات الأولية قرروا يدوا رجل الثلج اسم و دور أكبر و اتعمل له

مخصوص أغنية (In Summer)

٣- أغنية (let it go) كانت مكتوبة أصلاً للأميرة أنا و مع التحضيرات

اكتشفوا أنها تناسب الأميرة ايلسا اكر و اتعدل في كلماتها عشان

تناسب الشخصية.

٤- أغنية (do you want to built a snow man) بعد ما اتكتبت و

اتلحنت المخرج قرر انه يتخلى عنها. بس واحد من مساعدي المخرج

قاله أن الأغنية فضلت معلقة معاه طول الليل وبالتالي متوقع نفس

الشيء بالنسبة للجمهور.

٥- الممثلين اللي قاموا بدور الأميرات ايلسا و أنا (كريستين بيل، و أيدينا

منزلي) قدموا للقيام بدور روبنزل في فيلم ديزني الشهير (tangled)

والاثنين اترفضوا!

٦- هوس استوديوهات بيكسار بالتفاصيل خلاهم يستعينوا ب ١٥٠٠

انيميتور عشان مشهد بناء جبل الثلج يطلع بأدق التفاصيل زي ما هم

عايزينه!



٧- مره ثانية هوس بيكسار بالتفاصيل خلاهم بينوا برنامج انيميشن
مخصوص عشان شعر الأميرة ايلسا بيان حيوي وطبيعي بالشكل اللي
طلع بيه في المشهد اللي بتتخلص فيه من قيودها!

٨- من ضمن طرائف الفيلم أن المدقق هيلاقى الأميرة روبنزل ويوجين من
ضمن الناس اللي حضروا حفل تتويج الأميرة ايلسا!

٩- يعتبر الفيلم من اكتر أفلام الانيميشن إيرادات. إيراداته بما يعادل
إيرادات الأجزاء الثلاثة لفيلم (Toy Story)!

١٠- أغنية (let it go) اخدت أوسكار أفضل أغنية ودي واحدة من
جوائز الأوسكار اللي أترشح لها الفيلم وفاز كمان بأفضل فيلم
انيميشن لعام ٢٠١٣.

١١- في نظرية خرجت بتقول إن الأميرة ايلسا مش أخت الأميرة آنا! يقال
إن الأميرة ايلسا هي توأم الأميرة روبنزل اللي أمها شربت الزهرة
المسحورة وده اللي إدهم القدرات السحرية دي. أما عن السبب اللي
خلى ايلسا تتربى في مملكة ثانية فهي إن أمها وأبوها الأصليين خافوا
عليها خصوصا بعد خطف بنتهم الأولى روبنزل. النظرية دي بتفسر
اختلاف شكل ايلسا والقدرة السحرية اللي أبوها اتردد و هو بيعكي
عنها لل " ترولز " لما راح يشفي قلب " آنا " في أول الفيلم.

١٢- العرض الأول للفيلم شهد طلب من رواد السينما بجزء ثاني!

مستحيل تشوفه مرة واحدة بس!



بيتر بان " Peter Pan "

" انك تعيئت؟ انك تعيئت دي أكبر مغامرة حقيقية! "

ده واحدة من أشهر قصص الأطفال على الإطلاق... بيتر بان



القصة الأصلية كتبها الكاتب الاسكتلندي " جي. أم. باري " سنة ١٩٠٤ كانت في الأساس لفكرة طفولية تماما....

طفل عايش في مكان اسمه " نيفرلاند " المكان ده بيروحه الأطفال التاميين... بيعيشوا فيه من غير سلطة عليهم نهائي بيعملوا كل حاجة بيحبوها من غير مسؤولية أو عقاب.

عشان يبقى في حبكة للفكرة البراقة دي بتوصل لهم بنت " وندي " وبيقع في غرامها بيتر بان. بيتر ليه غريم هو كابتن " هوك " .

طبعا بعد المغامرة النهاية معروفة..... بتنتهي القصة بفوز بيتر على كابتن هوك الناضج...و يرجع وندي للعالم بتاعها ويرجع هو على " نيفر لاند " حلو؟ لا مش حلو.

القصة دي تحديدًا من أكثر القصص اللي بتداعب خيال الأطفال. كلها على بعضها مبهرة. فكرة الحياة من غير سلطة أبوية. عالم طفولي تماما بياكلوا وقت ما يحبوا و كل أكلهم أصلاً حلوي... جو حرتما دعه الكاتب بإضافة الطيران لمواهب الأطفال المفقودين دول.

حتى لما بيتر زار انجلترا عشان يرجع ويندي بيتها محسش انه مفقد الجو الأسري على الإطلاق... هو بس مفقد وندي!

كالعادة أول فيلم أنتجته ديزني في الخمسينات كان ملتزم تماما بالقصة الأصلية. بعدها توالى النسخ وصولاً إلى نسخة سنة ١٩٩١ "The Hook" و دي اللي رفضت ديزني إنتاجها رغم إنها كانت أفضل إعادة لقصة بيتر بان.

قصة الفيلم اللي أخرجه ستيفن سبيلبيرج وقام ببطولته روبين ويليامز و جوليا روبرتس بتتكلم عن إن بيتر بان رجع انجلترا وكبر وأصبح زوج وأب عادي جدا كل همه شغله عشان يوفر لأولاده حياة كويسة. ده طبعا اللي بيفسره أولاده انه عدم حب لهم. بيقوم كابتن هوك باختطاف أولاد بيتر بان و يقلمهم ضده عشان حابب ينتقم من بيتر بان اللي كان دايمًا يهزمه.

في النهاية برضه بيتر بان بينتصر على كابتن هوك بس وهو شخص ناضج لما بيتعلم إن الأسرة أهم شيء في الدنيا " وده تحديدًا كانت أفضل إضافة و تعديل لقصة بيتر بان ".

بعيد بقى عن الفيلم... قصة بيتر بان كان ليها انعكاس على الطب النفسي. في حاله بتسمى " متلازمة بيتر بان ".

المتلازمة دي بيجاني صاحبا من أعراض عدم النضج. عدم النضج على فكرة موجود فينا كلنا بنسب متفاوتة تجاه أشياء مختلفة. بس صاحب المتلازمة دي بيجاني رافض تماما التقيد بأي عمل ليه نظام وقواعد ولو اشتغل بيكون معروف عنه عدم الالتزام نهائي وبيغير اكر من شغل بسبب الموضوع ده.

حتى في الحياة الاجتماعية بيكون رافض تكوين بيت وأسرة. بيفضل دائما في مرحلة الحب وبيتملص من المسؤولية. ولو تجوز بتبقى مأساة لأن الطرف الثاني هو اللي بيتحمل كل حاجة لوحده.

في حالات موثقة لكنها قليلة قوي لاستخدام العنف من أشخاص مصابين بالمتلازمة ده ضد أهلهم أو رؤسائهم في العمل... لما تم إجبارهم على تحمل المسؤولية!

اتفرجوا مع أولادكم على فيلم " the hook " وبلاش النسخ القديمة. خيلهم يعرفوا إن الأسرة هي أهم شيء في الدنيا وإنه مهما كان وجودكم بيكون مزعج من وجهة نظر الطفل القاصرة إلا إنه مهم ومفيد..... وانتم كمان اتعلموا الدنيا ما تاخذكمش..... لان الدقيقة اللي هتفوتوها مش هترجع تاني. أولادكم هيكبروا بسرعة... مش زي بيتربان هيفضلوا أطفال للأبد.



2- من الداخل للخارج "Inside out"

" عمرك بصيت لحد وسألت نفسك هو في إيه في دماغه؟ أنا عارفة... على الأقل "

عارفة إيه بيدور في دماغ رايلي "



ده كانت الافتتاحية الجذابة
لفيلم اكتر من رائع وهو " من
الداخل للخارج / "Inside out"
الفيلم ده بشوف انه بينتمي
لمدرسة الأفلام الحديثة اللي بتربي
الأطفال والكبار على حد سواء.

أبطال الفيلم مشاعر طفلة مراهقة إزاي بيتحكموا فيها وفي ردود أفعالها.
الفيلم ده فكرته بسيطة لحد العبقرية بتصور إزاي كل واحد فينا بيفكر و
بتبرر كثير من التصرفات غير المفهومة أو غير المنطقية!

الفيلم بيظهر أن أول شعور بيتولد جوه الإنسان هو الفرح.... معاه بيتولد
الحزن.... يوم بيوم بتتولد مشاعر تانية هي الغضب والخوف والقلق.
المشاعر دي بتتحكم في البنت وتكون شخصيتها وذكرايتها .

الفيلم الممتع ده أنا شفته كتالوج إزاي تتعامل مع نفسك... إيه الصح وإيه
الغلط... الكلام اللي لو كل الناس قعدت تقوله ليل نهار هتعتبره مكرر
وتقليدي.... بتشوفه في الفيلم.... أو التعبير الأصح.... بتشوف نفسك في
الفيلم.... بتلاقي نفسك بتقبل النصائح دي بصدر رحب وهي أنك..



أولاً.. مستحيل تقرر إن شعور واحد يفضل يسيطر عليك طول الوقت.

محاولة انك تفضل سعيد على طول مستحيلة تماما.

ثانياً... أي تغيير يحصل حوالبك لو فضلت تستقبله انك تبقى متفائل و

كويس ورائع مش صح .كل تغيير حوالبك بيبقى فيه نقط إيجابية وسلبية .

تجاهل واحدة من الاثنين سيء.

ثالثاً.. -كتم الحزن أو الغضب أو الخوف و التظاهر بالسعادة والقوه من

أسوأ التصرفات... في النهاية عواقبها وخيمة جدا جدا

رابعاً... لو الحزن اختفى ببختفي معاه الفرح.... الاثنين خطين متوازيين .

خامساً... إوعى تسمح لمشاعرك الثانوية / السلبية تسيطر عليك .خصوصا

الغضب .

سادساً... كل ما ازدادت مقاومتك للحزن أو الخوف كل ما سيطر عليك

الغضب

سابعاً... الغضب بيخليك تخسر كل اللي حوالبك... حرفيا.

ثامناً... أسوأ أفكار على الإطلاق بتيجي في دماغك وانت غضبان .



ثاسعا... بعد فترة من سيطرة الغضب والإحباط والقرف والخوف عليك بتوصل لمرحلة اللامبالاة ...و ده من أسوأ ما يمكن فعلا. إوعى توصل للمرحلة دي أبداً.

عاشرا... الحزن مفيد.... لازم و ضروري و ما نقدرش نعيش من غيره.

حادي عشر... في لحظة في حياتك هتفتكر كل ذكرياتك الحلوة وتشعر بالحزن لأنك فقدت حاجة فيها... ده بداية النضج .

ثاني عشر... الحزن وظيفته انه يخلي الناس اللي حواليك تقرب منك اكتر. أو على أقل تقدير.... هتخرج الضغط اللي جواك في شكل دموع.

ثالث عشر... الحزن دايمًا نهايته فرح.... بديهي!

بعيد عن رسالة الفيلم ... اهتمام بيكسار بالتفاصيل فوق الوصف خلاهم يستعينوا بخبراء نفسيين وأطباء عشان يقدموا الفيلم بالشكل ده.....

- في البداية بيكسار كانت مخططة إن المشاعر المسيطرة على البنت تبقى ال ١٢ شعور الموجودين عند الناس كلها ورجعت اختصرتهم لخمسة بس لأن الوضع كان هيبقى صعب السيطرة عليه.

- المفاجأة العلمية اللي كثير هيتصدموها إنها المشاعر هي اللي بتسيطر على العقل مهما كنت إنسان عقلاني أو واقعي... و ده اللي بيتسمى كيمياء الدماغ.



- المشاعر المسيطرة على الست الناضجة هو شعور الحزن وهو الشعور - صدق أولا تصدق - الأقرب للهدوء والاتزان!
- الشعور المسيطر على الراحل الناضج هو شعور الغضب! بقية المشاعر الثانية بتحاول طول الوقت تهدي من الشعور ده لغاية مرحلة معينة وقتها الشعور ده بياخد في وشه و مبيبقش على أي شيء.
- شعور الحزن بيترجم أي اختفاء لشخص قريب على انه مبقاش يحبه أو مبقاش مهتم بيه. لو ضفت للمعلومة دي معلومة إن الحزن هو الشعور القائد في دماغ الست هتفهم الحاجات الصغيرة زي عدم الرد على التليفون أو انك تشوف الرسالة و متردش عليها بتكبر في دماغها إزاي. هي ببساطة بتترجم انك ما بتحبهاش.
- الست في العادي قوة ملاحظتها اكتر من الراحل. لأن الراحل بيميل إنه يدلع نفسه بانه بيشتغل باله بالحاجات اللي بيحبها. زي ماتش كورة أو إنه يفكر في أصحابه.
- الطفولة مرتبطة بالتصرفات السخيفة والتافهة لكنها أجمل شيء في الوجود. والشخص اللي ما شافش المشاعر دي مبقاش عاش طفولة صحية.
- الراحل لما بيعمل حاجة عشان يعجب الست بيفضل يشكر في نفسه. الست لما الراحل بيعمل لها حاجة من جواها بتفضل تشكر فيه!
- الصديق الخيالي هو الشخص الوحيد اللي بيبقى عارف أنك هتنساه وعلى الرغم من كده بيضحى بنفسه عشان انت تفضل سعيد. في حين إن الصديق الحقيقي بيستبدلك عادي.



- الست من وقت المراهقة لما بتفكر في رسم صورة لفتى أحلامها بتبقى مثالية للغاية وأهم ميزه فيها هي التضحية! ولأنها عارفة من جواها إن الصورة دي مثالية زيادة عن اللزوم بتخلي الشخص ده عايش بعيد جدا عنها لأنها واثقة إنها عمرها ما هتقابله!

- التدريس هو فعلا..... أصعب وظيفة في الكون!

الفيلم ده إنتاج سنة ٢٠١٥. فكرته جت لكاتب السيناريو لما بدأ يلاحظ التغيرات اللي بتحصل في شخصيه بنته اللي عندها عشر سنين. بدأ في صياغة الفكرة اللي ساعده فيها دكتور علم نفس من جامعه كاليفورنيا. فكرة الفيلم المبتكرة وتنفيذ استوديوهات بيكار المهرليه خلته ينجح نجاح ماهر على مستوى الجمهور والنقاد...وبصراحة يستحق .



3 - لملك الأسد / سيمبا "Lion King"

" تذكر... تذكر "

فكرة الفيلم أن ملك الغابة موفاسا جاله ولد سماه سيمبا. أخوه سكار



غضب عشان كان عنده أمل
يورث الحكم بعد موفاسا.
موفاسا بيتجاهل تصرفات
سكار و بيربي سيمبا و بيحبه
ويرعاه ويفهمه طول الوقت انه
هيبقى الملك وكل المملكة تحت
أمره و أد إيه الحياة هتبقى
وردية .

سكار بيقرر يقتل أخوه وبيقدر في نفس الوقت يقنع سيمبا انه هو السبب في
موت أبوه. سيمبا يهرب وبيقدر يدفن الماضي وراه وبيروح لاتنين أصحاب
بيعلموه إن كل حاجة تمام وهاكونا ماتاتا ومفيش حاجة تستحق القلق .

بس سيمبا بيعرف أن سكار دمر مملكة أبوه وبيستغل أمه فبيقدر يرجع
وبيتصارع مع عمه سكار وبيكتشف انه هو اللي قتل أبوه..... في النهاية سكار
يهرب وسيمبا بيمسك عرش أبوه وبيتجوز وبينتهي الفيلم النهاية السعيدة
المتوقعة.

في كام نقطه لازم نخرج بيهم من الفيلم ده لينا و لأولادنا...



أولا مافيش حاجة اسمها هاكونا ماتانا !الطبيعي انك تقلق و تخاف وتحاسب نفسك و تعيد حساباتك في الماضي وتقيّم نفسك والي حواليك عشان تقدر تفهم نفسك والي حواليك و تتطور .هاكونا ماتانا اخدت سنين من عمر سيمبا لو كان قلق و فكر كان ممكن يوصل لوحده لقناعة أن عمه سكار سيء وكان ممكن يرجع قبل كده على المملكة وينقذها وينقذ أمه!وده للأسف اكتشفه سيمبا متأخرا!

ثانيا...موفاسا على الرغم من معرفته ب سكار أخوه فضل بمنتهي السذاجة قريب منه ومخليه فرد من العيلة! رغم إن سكار هددته بشكل واضح وصريح " انت كمان حاسب تديني ضهرك!". موفاسا عمره ما علم سيمبا معني كلمة (دايرة الثقة) وده مش بس سبب موته وخسارة المملكة و حكم سكارو الضباع...لاده كمان سبب أن سيمبا خسر مراهقته وشبابه في حاله ضياع تامة!

خلينا بس نتفق الأول أن في حياة كل منا سكار! شخص قريب جدا ما تقدرش تبعده ولا تبعد عنه و مضطر تتعامل معاه انت وأولادك..... هنا بقى تيجي فائدة دايرة الثقة.

الفكرة انك تفهم أولادك أن في أشخاص ثقة يسمعو منهم الكلام ودول بابا وماما وأي حد انت شايفه ثقة. أي حد بره الدايرة دي لو قال حاجة لازم ترجع لي عشان أنا أكبر منك واعرف ده كويس ولا لأ. لو سألك أي سؤال عن حياتنا الشخصية ما ينفعش تقوله لأن في حاجة اسمها (خصوصية)



ما ينفعش تنقل أي كلام أو أحداث..... مهما كان سن ابنك / بنتك صغير لازم يعرفوا معنى دايرة الثقة.

موفاسا غلط كمان لما فضل يصور ل سيمبا مستقبليه الوردى من غير مشاكل ولا أزمات! كانت النتيجة صدمة قوية و من أقرب الناس ليه! ما ينفعش تربى عيالك على أن الحياة جنة وكل الناس رائعة ومخلصة... ما ينفعش تربى أولادك على أن الحياة يوتوبيا فيخرج في أول تعامل ليه يكره نفسه ويفقد الثقة في كل حاجة قلتهاله ويفقد الثقة فيك!

النسخة دي تم إنتاجها سنة ١٩٩٤ " عجزنا يا ولاد ". طبعا اشتهرت في مصر والعالم العربي بالنسخة المذبذبة اللي تألق فيها النجم محمد هنيدي في دور تيمون. ده بجانب النجم عبد الرحمن أبو زهرة اللي قدم أداء صوتي استثنائي في دور سكار خلى شركة ديزني تقدم له تكريم خاص وهدية على أفضل أداء في دبلجة لفيلم ديزني غير ناطق بالإنجليزية علموا أولادكم إننا بنغلط عشان نفكر في غلطنا ونتعلم منه (هاكونا ماتاتا أغنية حلوه مش واقع)، علموا أولادكم يقفلوا دايرة الثقة ويفضلوا جواها ومش أي حد يدخلها، علموا أولادكم أن النجاح مش سهل والحياة مش سهلة وزي مافيا الحلوفيا الوحش.



4- البحث عن نيمو "Finding Nemo"

" بس أنا وعدته مافيتش حاجة تحصل له.... "

ياااه! ده وعد غريب قوي، أصل ما ينفعلش تمنع عنه كل حاجة تحصل له... دي

تبقى عينلته ممله قوي! "



الأب اللي بي فقد الأم و الأولاد كلهم في
حادثة بينقذ واحد بس. الواحد ده
يبقى كل حاجة ليه في الدنيا.. طبيعي
يخاف عليه... بس الخوف بقى خوف
مرضي.

نيمو بيتخطف قدام عين أبوه اللي
بيقرب الدنيا. خوفه الشديد من كل حاجة بيتحول لطاقة جبارة بيسافريها
المحيط كله بحثا عن نيمو... بيكون معاه في الرحلة دي صديقة عندها
مشكلة في الذاكرة. في الآخر بيلاقي نيمو بعد ما بيمر هو نفسه بتجارب كتير و
بيكتشف إن ابنه نضج و اتعلم كتير في الفترة اللي اضطر يعتمد فيها على
نفسه.

طيب بشكل مبدئي الفيلم تربوي جدا...تربوي للآباء والأمهات مش العكس!
وبيحمل عدد من الرسائل اللي لازم كآب أو كأم تحطوها في الحسبان.

أولاً... انت كشخص ناضج طبيعي تمر بتجارب سيئة. الصبح بقى انك
تتعامل معاها مش تخزنها جواك و تفضل شايها للأبد.

ثانياً... ما ينفعش خالص برضه تعكس تجاربك السيئة دي على أولادك.
انت بتخرجهم يا إما ناقمين يا إما معقدين.

ثالثاً...الخوف غير المبرر مش تربية ده مرض. القلق الدائم مش حب ده
قلق! يا ريت تحط مشاعرك في صيغتها الحقيقية عشان تعرف أد إيه انت
بتظلم نفسك و أولادك....هتلاقي نفسك بتصدر لهم التوتر والقلق والعنف
اللفظي – ويمكن كمان الجسدي – والنقد المستمر و انت متخيل إن ده
حب... لا ده مش حب انت بتدمر نفسيتهم.

رابعاً.... نوع من النضج انك تفهم إن أولادك هيمروا بتجارب سيئة لان
ده العادي في الحياة. وظيفتك انك تأهلهم و تحذرهم – من غير تخويف- من
التجارب دي. و تفهمهم إزاي يتعاملوا معاها و تحتويهم بعدها.

خامساً....على سبيل التغيير اسمع لأولادك...ويا سلام لو خليتهم يجربوا
أفكارهم اللي بيطرحوها عشان يكتشفوا بنفسهم هي صح ولا غلط –
التجارب اللي ينفع تتجرب مش ابنك يجي يقولك لو حطينا الشوكة في كبس
النور هيحصل إيه تقول له جرب يعني!- ممكن تكتشف انت كمان إن كان
عندك قناعات غلط!



**سادسا... جرب حاجات جديدة...التجربة هتفيدك و تخليك شخص
انضج و أصلح في تربيته أولادك.**

**سابعا...ما تحكمش بالظاهر.... دوري كانت سمكة عندها مشكلة في
الذاكرة لولاها مكانش " مرهف/ مارلن" وصل لسيدني.... اسماك القرش
فيهم النباتيين.... السمك اللي كان مع نيمو في الحوض طيبين و ساعدوه
عشان يرجع المحيط.**

**ثامنا....كقناعة دينية ثابتة ممكن تكره شيء و يكون ربنا عامل بيه خير
ليك و العكس صحيح...خطف نيمو خلاله يفهم ليه أبوه بيخاف عليه و خلى
أبوه يوقف من حدة خوفه عليه!**

**ثاسعا...." ما توقفش عوم " في الحياة ما ينفعش لما يحصل لك حاجة
تقف تماما. اتحرك و فكر في نفس الوقت! ممكن لووقفت عشان تفكر
تضيع الطريق الصح من ايديك...ممكن لو اتحركت غلط تكتشف انه طريق
غلط و تتعلم منه و تعرف الطريق الصح منين... الحياة بتستمر ما تبقاش
على الرف!**

**عاشرا.... قول لأولادك انك بتحيم لأنك في زحمة الحياة و التربية مش
هيفهموا أد إيه انت بتحيم غير لما تقولها.**



الفيلم تم إنتاجه سنة ٢٠٠٣ و نال أوسكار أفضل فيلم انيميشن في السنة دي و اترشح ل ٣ أوسكار تانيين. ليه جزء ثاني " البحث عن دوري " فيه دوري بتقرر تدور على أهلها و رسالة الجزء ده إن الكائنات مهما كانت صغيرة بتعمل فرق لو اتحدثت، وإن بيئتك الأصلية و عيلتك أهم شيء في الدنيا.

الكوميدي في الفيلم ده انه كان معمول بهدف التوعية ضد صيد الأنواع المهددة بالانقراض من السمك و إزاي إن نقل السمك من بيئة لبيئة والاستهانة بهم بيسبب مشكلة " المحيط كله اتقلب في رحلة البحث عن نيمو " إلا إن رد الفعل كان حملة غير مسبوقة لاقتناء سمك الهلوان! البحث عن نيمو بيقدم تحذير من حالة " الآباء الاتكاليين " اللي اتكلمنا عليها في روبنزل بس المرة دي المسيطر بدافع الخوف الأب مش الأم.



5- المرعبين في الجامعة

"Monster university"

" بس لما بنخسر ما فيش حد هيخليك ننسى انك خسرت! "



على الرغم انه مش طبيعي إني أنكلم عن الجزء الثاني قبل الأول إلا أن الجزء الثاني هو اللي ستحق انكم تشوفوه مع عيالكم.

الجزء الأول بيتكلم عن شركة بتشغل كائنات مربعة فيها بهدف هلع الأطفال اللي هو بالنسبة لهم مصدر الطاقة الوحيد. لما الاتنين الأصدقاء المرعبين بيصطدموا بعالم البشر و طفلة مش

بتخاف منهم و بتتعلق بهم، بيكتشفوا مصدر جديد للطاقة بدل هلع الأطفال، وهو ضحك الأطفال.

الجزء الثاني بيتكلم عن الاتنين دول " مايك و سولي " في الجامعة وإزاي عرفوا بعض قبل شغلهم في شركة المرعبين....والاختلاف اللي ما بينهم اللي أدى في النهاية إنهم يكونوا أعز أصدقاء.

من الفيلم ده بقى نشوف شوية مفاهيم كده تصلح إننا نغير تفكيرنا بيها...

أولا... فكرة "القولبة" أو وضع الناس في قوالب غير قابلة للتغير... الفكرة دي بغض النظر إنها نمطية و موجودة في كل واحد فينا للأسف فهي بتعكس ضيق أفق شديد! انك تشوف شخص وسيم يبقى حكمت عليه انه

مغرور... ثري يبقى متعالى.... عالم لازم يبقى غير مهندم و ما بيعرفش حاجة عن التعاملات الاجتماعية! القولية لازم تتغير و ما ينفعش نحكم على حد من شكله!

ثانيا.... الورث! مدام أهله أذكاء لازم يبقى زيهم! الفكرة دي بتشكل ضغط غير طبيعي على الأطفال و إحنا مش واخدين بالناس للأسف. فكرة بابا دكتور و ماما دكتورة يبقى أنا لازم أبقي دكتور و إلا أكون بخيب أملهم! لازم نفهم إن في فروق فردية ممكن ابنك أو بنتك يبقى أي حاجة في الدنيا..... أولادك ممكن يورثوا اسمك بس مش لازم يورثوا شخصيتك و طباعك و دماغك!

ثالثا... يوضع سره في اضعف خلقه! اضعف كائن من وجهه نظرك ممكن يغير الدنيا من حواليك!

رابعا..... صوابك مش زي بعضها! زي ما قلنا قبل كده على فكرة الفروق الفردية. ممكن يكون شخص شاطر جدا في شيء و لا يصلح لشيء تاني.... سولي كان مرعب فاشل بس كان مدرب رائع!

خامسا.... الصداقة الحقيقية ممكن تبدأ بخناقة كبيرة! متخليش علاقاتك بالآخرين متطرفة في الحب أو الكره! ممكن اللي تحبه قوي و تشوفه أفضل أصدقائك يخذلك و ممكن اللي تكرهه قوي يقف في ظهرك و يبقى الصديق الحقيقي والسند اللي بجد.

الفيلم ده يطلق عليه "*prequel*" و هو عكس ال "*sequel*" يعني بيعكي أحداث ما قبل الجزء الأول مش بعدها. شركة ديزني هي اللي واخدة حقوق الطبع و التوزيع من البداية لكن شركة بيكسار هي اللي بتنفذ في



استوديوهاتها. ديزني طلبت أحداث ما بعد الجزء الأول لكن بيكسار قالت إن الفكرة والتنفيذ سيكون صعب.... ومن هنا جت فكرة " أحداث ما قبل الجزء الأول "

كعادة معظم الأفلام الي بتنفذها بيكسار بتكون مرسومة بالورقة والقلم و تربوية جدا تقريبا مافيش مجال لانتقادها عكس نسخ أفلام ديزني القديمة. شركة المرعبين كانت إنتاج سنة ٢٠٠١. فكرة الفيلم ظهرت للمرة الأولى سنة ١٩٩٤ وقت التحضير لفيلم " *toy story* " و فضل يتم التأجيل و التعديل فيها لغاية ما ظهرت النسخة بتاعة ٢٠٠١. القصة المبدئية كانت بتتكلم عن وحوش الخزانة الي بتظهر لراجل ٣٠ سنة و عمرها ما بتسيبه. كل وحش كان بيمثل خوف معين في حياته لما بهاجم الخوف ده في الواقع الوحش الي بيمثله في الخزانة بيختفي. على الرغم من سحر الفكرة إلا أنها بالنسبة لفريق الإنتاج كانت مباشرة زيادة عن اللازم، و اتعدلت للشكل الي ظهرت بيه في ٢٠٠١.

الجزء الثاني " المرعبين في الجامعة " إنتاج سنة ٢٠١٣ و الجزئين حققوا رد فعل رائع على مستوى النقاد والجمهور.

من وجهة نظري الجزء الثاني يعتبر اكثر فيلم انيمشن يبدأ بداية مبهجة وينتهي نهاية اكثر من مبهجة، و خلاله دروس المرعبين اتعلموها من ألم نفسي! يعني بنظرة كده على كل الأفلام الي معلقة معاك لازم تلاقي في الصراع الي بيحصل في أحداث الفيلم لازم يبقى في دراما إلا الفيلم ده.... مبهج تماما!



6 - العصر الجليدي "Ice age"

" تقدم تطلع على ظهري يا دياجو...."

لا متشكر... أنا هحتفظ لنفسي بشئوية كرامة!

انت معانا دلوقت المفروض تنسى يعني إيه كرامة!



بغض النظر عن إني ضد الجملة دي تماما
وبشوف إن لازم ننقل لأولادنا يعني إيه كرامة
وإزاي يحافظوا عليها، إلا إن مافيش حد فينا يقدر
ينكر إن في مجموعة من الناس لما بتتجمعوا مع
بعض

بتنسوا المصطلحات دي تماما! بتقوموا بتصرفات

غبية أو سخيفة... مش بتخافوا إن حد فيكم يحكم على الثاني... ولا
بتخافوا حد يحكم على تصرفاتهم أصلا.... دول ممكن قوي تكون قابلتهم
صدفة... ممكن تكون قابلتهم و انت صغير أو لما كبرت... ممكن تكون ما
قابلتهم مش خالص في حياتك و بتتكموا في الواقع الافتراضي بس! بس
الخلاصة إن حياتك ما بيبقاش لها طعم من غيرهم!

قصة الفيلم ببساطة ماموث " و ده فصيلة منقرضة من الفيلة" وحيد
تماما بيتقابل مع حيوان الكسلان و بيخوضوا رحلة عشان يرجعوا طفل
صغير لأهله. بينضم لهم نمر " من نوع منقرض برضه " هدفه الأساسي انه



ياخذ منهم الطفل أصلا ويرجع بيه لزعيم قطع النمر الي عايز ينتقم من الصياد أبو الطفل الصغير بأنه يقتله.

مع الوقت النمر " ديجو " بيتعلق بالطفل وبيتعلق بأصدقاء الرحلة " ماني و سيد "، وفي النهاية بيوصلوا لهدفهم و بيصبحوا قطع يختلف عن أي قطع ثاني!

كل أفلام الانيميشن لازم تكون كوميدية لأنها بالأساس موجهة للأطفال. بس من كل الأفلام دي ده اكثر فيلم الكوميديا فيه صارخة فعلا! بعيدا عن الكوميديا خلينا نشوف نقدر ناخذ إيه من الفيلم ده...

أولا... مهما كانت ظروفك ما ينفعش تبقى وحيد. الوحدة عمرها ما توصلك لأي مكان مهما حسيت إنها مريحة.

ثانيا... الإزعاج مطلوب و مفيد و الله. صاحبك الي شايفه مزعج مش هتقدر تستغنى عنه أبدا.

ثالثا... لما بتتجمع انت و آخرين لعمل خير ده بتكون أفضل صداقة و بتبقى.

رابعا.... انك تنسي الإساءة ليك و تتعامل بأخلاقك أفضل من انك تعامل الآخرين بأخلاقهم. ماني على الرغم من إن البشر قتلوا أبوه و أمه إلا انه حارب عشان يرجع ابن الصياد لحضن أبوه.



خامساً....الكائنات عموماً بتتغير، و ممكن تبدأ في سكة بنية وتلاقي نفسك مش بس غيرت طريقك لا ده انت ممكن تغير قناعاتك و تتغير انت شخصياً.

سادساً.... مش شرط تبقوا شبه بعض عشان تبقوا قطيع! ممكن تكونوا مختلفين جداً و ده سبب اكتر من كافي عشان تبقوا أصحاب حقيقيين.
بالنسبة للفيلم نفسه هو إنتاج استوديوهات شركة بلوسكاي والي وزعته شركة " 20th century fox "

أول جزء كان إنتاج سنة ٢٠٠٢ و آخر جزء كان إنتاج ٢٠١٦. الأجزاء كلها بتدور طبعاً في العصر الجليدي "مش محتاجة إني أقول يعني" بتتغير طبعاً بأن ماني بيلقي ماموث بنت و بيحبها و بيتجوزوا. ديجو بيلقي نصه ثاني "برضه". حتى سيد بيلقي حظه من السعادة. ظهرت كمان شخصية مميزة جداً و هي باك المختل اللي بتزعل لما بيختمي و يسيهم كل مرة.
الفيلم نال استحسان النقاد و الجمهور على حد سواء. الأجزاء الأخيرة واجهت اعتراضات إنها فيها مشاهد و عبارات ممكن تكون غير مناسبة للأطفال. للأسف التقييم ده صعب أنفيه أو أؤيده لان الأطفال دلوقت و من سن صغير عندهم وعي كبير بحاجات كثير كانت غائبة عن أهلهم و هم في سنهم!



7- شريك الغول "Shrek"

" دول بيحكموا عليا من غير ما يعرفوني، عثنان كده أنا بفضل أكون

لوحدي "



على الرغم من إن الجملة دي تحديدا واقعية جدا
لدرجة الألم، إلا أن سلسلة أفلام شريك من اكتر
الأفلام الممتعة اللي ممكن تشوفها في حياتك.
قصة الفيلم عن ملك بيدور على عروسة تصلح
إنها

تكون زوجة ليه. بيختار أميرة محبوسة في قلعة بيحرسها تنين. بيقرر يعتمد
على غول عشان يجييهاله. الغول بيوافق لأن الملك ده سرق أرضه ووعدده
يردهاله لو نجح في مهمته وأنقذ الأميرة.

بينطلق في رحلته مع حمار فصيح. بينجح في إنقاذ الأميرة اللي بتكتشف إن
لعنيتها اكبر بكثير من مجرد الاحتجاز! الأميرة فيونا بتتحول في الليل لغولة!
وهي بتسرع في خطوات العودة عشان تتجوز الملك لأنه اللعنة هتفك لما
تقابل حيا الحقيقي. الحب الحقيقي شرط التحرر من اللعنة دي.
الجميل إنها بتحب شريك و هو بيحبها. فبتبقى غولة للأبد...والاثنين
بيعيشوا سعداء..

كعادة معظم الأفلام اللي بيتم إنتاجها مؤخرا الفيلم فيه شوية أفكار نقدر نخرج بيها...

أولاً.... الخوف من حكم الآخرين عليك أسوأ حاجة ممكن تحصل لك في الدنيا. بيوصلك لأنك تكون كائن بشع فعلا.

ثانياً... الشخص اللي بتشوف وجوده في حياتك تقيل على قلبك لمجرد انه يحاول يخرجك من عزلتك ده الصديق الحقيقي اللي مش المفروض تفرط فيه.

ثالثاً...الفيلم ده من الأفلام اللي ضربت نظريات أفلام ديزني القديمة في مقتل! الأمير مش شرط يبقى نبيل وكريم وراقي.. ممكن يكون سئى عادي جدا يعني! المنصب مش معناه حسن الخلق! على الجانب الآخر المهمشين في المجتمع اللي بيتم استغلالهم هم اللي قلوبهم طيب فعلا.

رابعاً...ممكن ببساطة تكون انت اللي متسبب في لعنتك! ما تخافش من الاختلاف لأنه مش شرط يكون معناه حاجة وحشة! ممكن تكون مختلف فبلاش تجبر نفسك انك تبقى عادي.

خامساً... لما تحب نفسك الناس هتحبك أيا كان شكلك!

الجزء الأول من شريك إنتاج عام ٢٠٠١ تنفيذ شركة دريم وركس بالاشتراك مع استوديوهات بيكسار و توزيع ديزني! الفيلم بدأ بقصة تم نشرها سنة ١٩٩١ واشتري حق تحويلها لفيلم المخرج ستيفين سبيلبيرج إلا انه تخلي عن الحق لصالح دريم وورك اللي بدأت في دراسة المشروع سنة ١٩٩٥!



للأسف كانت لسه الشركة بادئة في شغل الانيميشن. بس عموما ده لحسن
الحظ لان لو إنتاج الفيلم كان قبل ٢٠٠١ ممكن كان يخرج بشكل اقل من
كده.

الفيلم اترشح لعدد من الجوايز و فاز بأوسكار أفضل فيلم انيميشن سنة
٢٠٠١.

صدر له ٣ أجزاء كل واحد فيهم بيشتغل على نفس الفكرة " إزاي تقبل
نفسك رغم الانتقادات " الأجزاء كانت من القوة إنها تناقش " عدم ثقة
شريك في نفسه " بأنه يثق في ساحرة لما تعرض عليه انه يبقى شاب وسيم
وهو رحب بده وما فكرش في المخاطر اللي وراء العرض ده!

جزء تاني ناقش الضغوط اللي بيتعرض لها شريك بعد تحوله من كائن "
غير اجتماعي " لرب أسرة و زوج و محبوب من الجميع و إزاي التحول ده
مش حاجة سهل أي كائن يتقبلها على العكس ده هيجس معاها بالضغط
العصبي اللي هيخليه يتمنى يخلص من كل ده!

سلسلة شريك في المطلق بتسخر من الثوابت اللي أميرة فيها لازم تكون
جميلة و قليلة الحيلة و البطل لازم يكون أمير و وسيم. السخرية دي واضحة
جدا في الأجزاء كلها.

سلسلة شريك نجحت نجاح ماهر_ جماهيريا و نقديا- و حققت أرباح عالية
لدرجة إن " إيدي مرفي " اللي قام بعمل الأداء الصوتي للحمار صديق شريك
كان بيتربع على عرش الممثلين الأكثر ثراء في الولايات المتحدة بعد صدور
الجزء الثالث!



8 - حكاية لعبة "Toy story"

" اللعب بتقدم كتلوف كووووووول حاجة "

هو إزاي فكرة مرعبة كده ينفع تكون سلسلة أفلام أطفال حلوة كده؟



الفكرة المرعبة هي الفكرة اللي مرت بخيالنا كلنا
و إحنا أطفال. لما بنسبب الألعاب لوحدها
بتعمل إيه؟

في الفيلم الحياة بتدب في الألعاب و بتتحرك و
بتخطط

و تنفذ..و أول ما تحس إن في شخص هيقرب
منها بترجع فجأة مجرد ألعاب بريئة!

لما بيعي ينضم للألعاب لعبة جديدة " باز ", بيحاول " وودي " اللعبة المفضلة
للطفل اندي انه يتخلص منه خصوصا مع شعوره إن اندي بيفقد شغفه
بيه و بعالم رعاة البقر اللي هو بيمثله. لما خطته بتنجح أصحابه بيرفضوا
اللي عمله فبيضطر انه يرجع بازتاني في مغامرة بيتعلم فيها كتير....في النهاية
بيكتشف إن اندي بيعبه و مستحيل يتخلي عنه.

الفيلم ده عايز يقول إيه؟

أولاً... الفيلم بيناقش بشكل طفولي قضية معقدة جدا أنا لغاية دلوقتي
مش قادرة استوعب إن فيلم أطفال بيناقشها و هي فكرة " الفقد و



الاستبدال!" و الفقد هنا على مستوى عالي مش انك تفقد شخص مات لا ده حي قدامك بس هو خلاص ما بقاش يحبك!

عمرک فکرت إن المشاعر دي ابنک/ بنتک بيختبروها و هم أطفال طول الوقت؟ لما بتسيهم و تروح الشغل؟ لما بتقعدي ماسكة الموبيل أو لما بيعي طفل جديد. هو بيرفض كل ده و بيحاول يتخلص من إحساس انه بقى "على الرف " بأنه يبقى عصبي أو يعيط أو يبقى عنيف!

"وودي" كان سعيد في حياته.. فجأة جه باز عشان اندي يحبه و يدي له كل الاهتمام. و من هنا بدأت تصرفات وودي الغريبة.

ثانياً...الأصدقاء اللي بجد اللي يقفوا ضدك لما تعمل حاجة غلط. هو ذا الصبح، مش إنهم يقفوا معاك و ينصروك على شخص غريب لمجرد إنهم ينصروك " انصر أخاك ظالماً أو مظلوماً "

ثالثاً....المكانة مش بتتغير لكن يمكن الاهتمامات تتغير! يعني لما تكوني أم جديدة لازم تفهمي ابنك/ بنتك الكبيرة انه كان و مازال و سيظل في مكانته. بس يمكن تهتمي بالصغير شوية لأنه صغير....طمنوه.

رابعاً...الظروف اللي ممكن تجبرك تعمل حاجة أنت مش عايزها بتعلمك انك تنضج و تشوف الأمور بشكل أفضل.

خامساً....غريمك الجديد ممكن يكون مستقبلاً سندك الوحيد. مأخذي الوحيد على الفيلم انه هول من حجم علاقة اندي باللعب بتاعته و على الأرجح خلى أطفال كتير تحس بالذنب تجاه ألعابها. الفيلم إنتاج سنة ١٩٩٥ " أيوه انتم كبرتوا فعلاً و الفيلم الأول فات على إنتاجه ٢٣ سنة!"



الجزء الأول يعتبر أول إنتاج لاستوديوهات بيكسار "كان وش السعد علينا و الله " بالاشتراك مع ديزني طبعاً. الجميل إن المنتج المنفذ ليه كان ستيف جوبز! أبوه هو بتاع شركة ابل!

نجاح نجاح جماهيري ساحق و نال استحسان الجمهور و خبراء التربية! حجم الجوايز اللي اترشح لهما محتاجة صفحات للسرد و فاز بأوسكار أفضل سيناريو فيلم انيميشن و أفضل أغنية. النجاح ده فضل مكمل للجزء الثالث اللي تم إنتاجه سنة ٢٠١٠ و فيه بتأكد مخاوف الفقد والاستبدال بتجربة لعب تانية خاضتها و أصحابهم اتخلوا عنهم! التجربة دي بتخلهم ناقلين على البشر و اللعب اللي بتحيهم. بس ولأن اندي صديق مخلص ما بيقدرش يتخلّى عن لعبه، بينقلهم كلهم لبيت بنت هو عارف إنها هتاخذ بالها من أصحابه القدام و بيقدر يحتفظ ب " وودي". في اللحظة دي وودي بيثبت انه هو اللي كبر. بيختار انه يفضل مع اللعب أصحابه بدل ما يروح مع اندي لوحده.... في مشهد أبكى الملايين فعلاً لما اندي بيسيب أصحابه و يروح الجامعة و أصحابه اللعب بيقفوا يودعوه وداع أخير.... في إشارة إن الحياة ممكن تستمر مع الفقد لو ليك سند حقيقي..



9 - خايططة بالصاصة... "ratatouille"

" لو فضلت تبص وراك... عمرك ما هتقدم تلتنوف إيه اللي مستنيك "

فيلم تاني بيتكلم عن القولبة بس بشكل مختلف وأقرب للتطرف!



فار بيحب الطبخ!

الفار اللي أهله كلهم فيران طبيعيين بياكلوا من الزبالة أو بيسرقوا أكل المطابخ. ما فيش أي إحساس

ناحية الأكل ولا مزاج ليه. فجأة بيظهر بينهم الفار ده اللي موهوب جدا في التفرقة بين الروايح بتخليه

مهم بالنسبة ليه. في الآخر بيقرر يسيهم ويتبع حلمه بأنه يطبخ وصفات خاصة بيه... وبيكون دليلة في الرحلة دي شبح أعظم طباط فرنسي وهو جوستو!

على الجانب الآخر، بيظهر "لو"، شاب مش موهوب على الإطلاق واللي بيروح يشتغل في المطعم بتاع جوستو. وهناك بيقابل "ريمي" الفار اللي بيكتشفوا مع بعض إن الفار مش بس موهوب في الطبخ لا ده كمان بيقدر يتحكم في "لو" وبيخليه يطبخ بإيده! الوضع كان "رابح/ رابح" لغاية ما بيكتشف مدير مطعم جوستو إن "لو" هو ابن جوستو ووريث المطعم... وكمان انه ما بيعرفش يطبخ وبيتحكم فيه فار! بس في النهاية طبعا بينجح الفار الموهوب وبيثبت لأهله انه كان صح في رحلة البحث عن ذاته وبيكشف للعالم انه هو الفار الطباخ!



الفيلم ده بيقول إيه؟

أولاً..... لازم تسمع لأولادك كويس قوي و مش شرط لأنك ناضج و مريت بتجارب كتير تسفه من أحلامهم أو طموحاتهم. لو مش هتقدر تمشي معاهم في مشوار حلمهم مش لازم تبقى عقبة بكلام سلي و نقد لموهبة حقيقية ممكن تكون - انت بس - اللي شايف إنها ولا حاجة.

ثانياً... مش كل التمرد على التقاليد سيء! ممكن يكون كويس و مفيد لان الكائنات اللي ما بتفكرش و ما بتغامرش هي اللي بتموت في مكانها!

ثالثاً... ما تقللش من نفسك مهما كان ماضيك خصوصاً لو كنت موهوب، عملك هو اللي المفروض يتكلم عنك!

رابعاً.... مش عيب انك تفشل... طبيعي انك تحبط... بس ما تستسلمش لليأس.

خامساً.... دايماً ابسط الأشياء بتكون أكثرها قوة! الطبخة القديمة التقليدية هي اللي أنقذت الفار الطباخ من النقد اللي تسبب في حسرة جوستو في يوم من الأيام!

الفيلم ده من إنتاج سنة ٢٠٠٧ و كان خامس فيلم تنتجه استوديوهات بيكسار بس كان توزيع شركة اسمها " Buena vista ". أخرجه و شارك في كتابته النجم براد بيت. ده غير انه قام بالأداء الصوتي لدور " جوستو "



اسم الفيلم اللي اتمصرل " خلطبيطة بالصلصة " هو "ratatouille"
وهو طبق فرنسي عبارة عن شرائح خضار عليهم صلصة، كانت بتعتبر أكلة
شعبية فرنسية
بدأ الكتابة والإعداد للفيلم ده من سنة ٢٠٠٥. أخذ سنتين في التنفيذ.

فاز بجائزة أوسكار أفضل فيلم انيميشن. وسنة ٢٠١٦ دخل قائمة أفضل
١٠٠ فيلم انيميشن في التاريخ.
في نظرية خرجت بتقول إن ريمي اتعلم طبخ الوصفة دي " خلطبيطة
بالصلصة " من أم " ايجو " ناقد الطعام. عشان كده لما داق طبق ريمي
رجع لذكريات الطفولة.
ايجو دخل التاريخ بالجملة اللي ناس كتير شافت إنها بتعبّر عنهم " أنا مش
بحب الأكل..... أنا بعشقه!"



1- حياة حشرة "Bug's Life"

" مع بعض حتى الصغيرين قوي... يقدروا يحققوا هدف كبير "

فيلم أطفال ده ولا فيلم سياسي؟

قصة الفيلم عن مستعمرة نمل بتحكمها الملكة والأميرة.

النمل بيشتغل فيها تحت رحمة حشرات اكبر "

بلطجية " عشان يدفعوا لهم نسبة من اللي

بيجمعه من أكل و شرب. الفكرة إن البلطجية هنا

بيجوا في يوم بيطلبوا ضعف اللي بياخدوه. هنا

بيقرر واحد من النمل العامل انه يتمرد ويعترض. اللي بيعمله ده بيكون

سبب في إن النمل كله يتحد و في الآخر بيوصلوا إنهم بيتخلصوا من سلطة

الحشرات البلطجية.

في الفيلم ده هتلاقي...

أولاً...رسالة واضحة وصريحة... لما تبقى في موقف قوة وتستضعف

الآخرين ما تزودهاش... لأن لكل كائن طاقة والضغط بيولد الانفجار.

ثانياً.... مهما كنت ضعيف أو مستضعف. أقل خطوة تجاه وقف الظلم

بتفرق جدا.



ثالثاً...تصنيفات عالم الحشرات العنصرية " نمل عامل / نمل محارب "

مش كافية للحكم على النملة! ممكن تكون نملة عادية بس قوية و تقدر تواجه المحاربين!

الفيلم من إنتاج سنة ١٩٩٨ إنتاج شركة بيكسار وتوزيع شركة ديزني.

الفيلم ده بيناقش زي ما قلت قضايا اكبر من فهم الأطفال. التمرد...

السلطة... المسؤولية! الغريب إنها كلها خارجة في الفيلم بشكل سلس جدا

من غير أي تعقيد!

الفيلم نجح جدا على مستوى النقاد و الجمهور....وفاز بعدد كبير من

الجوايز.



11 - بينوكيو "Pinocchio"

" و دالها خلي ضميرك ... هو حكمك! "



رجل وحيد بيحلم انه يخلف و ما بيقدرش...
بيقرر يصنع طفل من الخشب و يسميه بينوكيو.
بينوكيو بيحركه في الدنيا فضول ناحية كل شيء....
فضول بيخليه يسبب أبوه و يقرر بخوض تجربة البحث
عن طريقة يقدر بها يبقى طفل طبيعي! بيخوض تجارب
كثيرة و في الآخر بيوصل لهدفه.

قصة الفيلم هي صدام ديني صريح للأسف، تم استخدام القصة في دس
مجموعة من المفاهيم التربوية المفيدة في استخدام واضح و صريح لعبارة "
الغاية تبرر الوسيلة!"

أولاً... فكرة صنع بينوكيو و التعلق بيه و عدم السيطرة عليه.....كلها

بتصب في فكرة انك عمرك ما هتقدر تصنع شيء و تسيطر عليه تماماً!

ثانياً... رحلة بينوكيو ما كانتش ممتعة تماماً.. على العكس! فيها منحنيات

مخيفة فعلاً من خطف و استغلال... يعني ببساطة كده هي إشارة لأي طفل
يحاول يخوض تجربة زي دي انه هيوواجه صعاب كثير.



ثالثا... استخدام الكذب مش وسيلة للنجاة، على العكس ده بيبقى واضح و هتتكشف! بس المشكلة إن بينوكيو هستخدم الكذب مرة و هينجو من الاحتجاز بفضل مناخيره اللي بتكبر!

رابعا... شرط الجنية عشان تحول بينوكيو لطفل حقيقي انه يحكم ضميره في تصرفاته. ودي نصيحة ممتازة بس المشكلة إن الضمير أصلا مش هيجي "باكج" مع تحول الخشب لإنسان! ده بيعي بالتربية السليمة اللي بتلمي الضمير، لان فيه تربية و ظروف و بيئة بتقتل الضمير ده في مهده و تخرج أشخاص منعدمة الضمير!

الفيلم ده أنتجته شركة ديزني سنة ١٩٤٠ ويعتبر من أفضل إنتاجات ديزني القديمة من حيث الصورة والإخراج. الفيلم مبني على قصة " مغامرات بينوكيو " اللي كتبها الايطالي كارلو كلودي سنة ١٨٨٣.

سنة ٢٠٠١ خرج للنور فيلم اسمه " Artificial intelligence " أخرجه العبقري ستيفن سبيلبيرج. على الرغم من ان قصة الفيلم مبينة على قصة قصيرة للكاتب براين ادليس كتبها سنة ١٩٦٩ إلا إنها ببساطة لا تختلف عن قصة بينوكيو نهائي. الفكرة بس إن بينوكيو كان خشب لكن ديفيد " الطفل اللي في الفيلم " روبات! الفيلم بتدور أحداثه في المستقبل عن ست بتفقد ابنها فبتقرر تبني روبات بيعيها بجنون. بتستعيد ابنها و بتحصل مشاكل بينه و بين ديفيد فبتقرر تتخلص من ديفيد بشكل سلمي " أفضل



من إنها تعيده الشركة الي متعلمه ". ديفيد بيسافر العالم كله بحثا عن طريقه تخليه " طفل حقيقي" عشان يرجع لأمه وتحبه أد ما يحبها! فيلم سبيلبرج غير مناسب للمشاهدة العائلية....وشخصيا لا أفضل إن الأطفال يشوفوا فيلم بينوكيو أصلا....

بعيدا عن قصة الأطفال دي في حالة مرضية اسمها " متلازمة بينوكيو" بيعاني المصاب بها ب " الحازوقة/ الزغطة بالمصري " كل ما بيكذب! يبقى كذبه مفضوح جدا يعني اكثر من المناخير الي بتكبر! الأجمل إن الحالة دي بتفضل مستمرة مع الشخص ده لغاية ما يقول الصدق!

❀ ❀ ❀ ❀ ❀

12 - نشارلي في مصنع الشكولاتة

"Charley & The Chocolate Factory "



" فلوس! في فلوس كثير في الدنيا
وكل يوم ييطبعوا منها اتر... لكن
ما فيش غير خمس تذاكر بس في
العالم كله! الغي بس هو اللي
بضحي بالذمرة عشان الفلوس...
انت غي؟"

لما تكون فقير قوي....هل ممكن
تضحي بفرصة عمرك عشان
أسرتك؟

قصة الفيلم عن تشارلي الطفل الفقير الي أهله كلهم بيحاولوا يشتغلوا
عشان يوفر قوت يومهم لكن في بينهم حب و تماسك. بيعلن " ويلي وانكا "
صاحب مصنع الشكولاتة الأشهر عن جائزة ٥ تذاكر لزيارة مصنعه. تشارلي
بيكون محظوظ كفاية انه يلاقي تذكرة و بيدخل عالم ويلي وانكا
الساحر....بيكتشف في الآخر إن المسابقة دي كانت بهدف البحث عن وريث
للمصنع. لكن يا ترى إيه المقابل؟

الفيلم ده فيه إيه؟

الفيلم ده مكتوب بعناية ككبسولة تربية بتوضح اثر التربية السيئة على الأطفال بشكل متطرف فعلا! عن الأم اللي بتنشيء طفل شره أو اللي بيخرج طفلة مدللة أو اللي بتربي طفلة عنيدة أو اللي بيسيب ابنه ليل نهار قدام التلفزيون! في النهاية الفيلم بيقولك باختصار انه بغض النظر عن حالتك المادية، إنشاء طفل عنده أخلاق أهم من أي شيء فالدنيا.

ده غير انه اتكلم طبعا عن خطأ الآباء في التشدد ورفض الاستماع لأولادهم اللي بيؤدي في النهاية للانفصال النفسي! ويلي فضل طول عمره كاره الناضجين لأنهم في نظره صورة للتحكم من غير عواطف!

الفيلم ده إنتاج سنة ٢٠٠٥ إخراج المبدع تيم بيرتون. نجح الفيلم جدا على مستوى النقاد والجمهور خصوصا لوجود النجم جوني ديب في دور ويلي وانكا... الحقيقة إن في كيمياء بين بيرتون و ديب والأفلام اللي بيشاركوا فيها بتكون اكتر من مميزة. طبعا ديب كان نجم فيلم انيميشن إخراج بيرتون وهو فيلم " العروسة الجثة!" بس أنا ما بعثبروش فيلم أطفال مش لأنه قاتم و كئيب بس... لا ده كمان لأنه يناقش قضية علاقة الأحياء بالأموات بشكل فلسفي!

عن نفس القصة تم إنتاج فيلم ويلي وانكا و مصنع الشكولاتة سنة ١٩٧١ و نال نفس الاهتمام والنجاح خصوصا إن كاتب السيناريو هو كاتب القصة الأصلية الانجليزي راولد دايل..... دايل بالمناسبة دي كاتب قصص أطفال كثير منها ماتيلدا... والعماق الضخم الطيب.

ناقص بس أقول انه في الثمانينات " جيل العز " تم إنتاج مسرحية عن القصة دي قام ببطولتها الفنان الراحل أبو بكر عزت في دور ويلي وانكا. المسرحية في أجزاء منها متوفرة على اليوتيوب بس مش كاملة للأسف.



14 - حياة نحلة "Bee Life"

"شغلانة واحدة بس للأبد؟! ده يبقى اخيل مجنون!"



عن دائرة الحياة نتحدث!

باري بي نحلة متخرج جديد بيشف هيشغل في إيه... بيكتشف إنه مؤهل إنه يكون عامل فقط. ولأنه ناقم على النظام و متمرّد، بيحصل له موقف ببعده عن تجمع النحل وبيتعرف على إنسانة و بتكون صديقتة الوحيدة. بعدها بيكتشف فجأة إن العسل اللي

النحل العامل بيبدل فيه حياته عشان يجمعه الإنسان بيستخدمه من غير أي مقابل للنحل. بيقدر رفع قضية على البشر عشان يتم وقف استخدام العسل، والنحل هم اللي يستفيدوا بيه... لكنه بيكتشف انه كان غلطان و إن العمل المستمر اللي كان بالنسبة له غير مجدي هو في الواقع أساس الحياة على وجه الأرض!

الفيلم ده من الأفلام المميزة فعلا في نقل صورة دورة الحياة بشكل مبسط.....

أولاً... مافيش عمل " سيزيفي " من غير جدوى أو مردود! كل كائن في الدنيا

بيعمل حاجة بيترتب عليها حاجات تانية بتخدم البيئة.



ثانياً...التمرد مش دائما حلو! خصوصا لو ما عندكش بعد نظر ومش

شايف نتيجة تمردك ده إيه!

ثالثاً...السبيل الوحيد لإنقاذ نفسك من أي موقف سيء انك تتصرف على

طبيعتك اللي ربنا خلقك عليها!

الفيلم ده من إنتاج سنة ٢٠٠٧. صاحب الفكرة والبطل في دور باري والمنتج

هو الممثل الشهير جيري ساينفيلد. الفيلم من إنتاج شركة دريم ووركس.

الفيلم نجح جماهيريا لكن تباينت الآراء عنه لأنه مش كوميدي قوي!


البعض اعتبره مباشر أكثر من اللازم كأنه فيلم توعية بيئية! ده ما منعش

انه يترشح لعدد من الجوايز المهمة ويفوز بعدد منها.



15 – طرزان "Tarazan"

"نق في قلبه..... وسيب القمر يقر"



طفل وحيد بتربيته الحيوانات...تحديدا الغوريلات!

الفكرة باختصار عن مستعمرة انجليزية في إفريقيا فيها راجل ومراته وابنهم الرضيع.. الأب و الأم بيقتلهم نمر. بتلاقي الطفل غوريلا عاقر... بتربيته كأنه ابنها... بيكبر طرزان وهو عارف انه مختلف فدا بيدفعه انه يثبت نفسه اكثر في عالم الحيوان و بينجح في ده.

بعثة انجليزية تانية ظاهرها العلم و باطنها نهب الثروات بتوصل للغابة. طرزان بيقابل جين، البنت الانجليزية اللي على إيديها بيكتشف انه إنسان. قائد البعثة بيخدع طرزان و بيحاول يصطاد الغوريلات بهدف الاتجار فيهم لكن طرزان بيكتشف نية القائد ده و بينقذ أهله... في النهاية بيصبح هو قائد مجتمع الغوريلات و جين بتفضل معاه في الغابة.

طبعاً الفيلم ده لأنه إنتاج سنة ١٩٩٩ كان تم تعديل قصته عشان تبقى كلها رسائل ايجابية... ديزني زي ما قلنا بدأت تاخذ بالها من المشاكل التربوية اللي بتقابلها في قصص الأطفال و تعالجها بشكل صحيح. الفيلم ده نجح جماهيرياً و نقدياً و فاز بجائزتين أوسكار " أفضل موسيقي فيلم انيميشن و أفضل أغنية "

القصة الأصلية للكاتب ادجار رايس بروز صدرت سنة ١٩١٤ لكن للأسف هي عنصرية جدا!

طرزان في القصة مش بس بيخضع له الحيوانات لا كمان أفراد القبائل الإفريقية! يعني من الآخر الكاتب قدم نموذج الرجل الأبيض القوي الشجاع الي بينيم إفريقيا كلها من المغرب! الكوميدي في الموضوع إن الكاتب كان بيقدم طرزان الي مربياه الغوريلات وسيم وشعره مسبسب! في حين انه منطقيا لو طفل كبر في الغابة هيكون له دقن ضخمة و ما يعرفش عن النضافة الشخصية غير الي بتعمله الحيوانات!

هل قصة طرزان دي لها أصل؟

الحقيقة ان في عدد من الحالات المسجلة لأطفال تاهوا من أهلهم وربتهم الحيوانات....منهم الي ربه الذئب... الي ربه الكلاب... الي ربه الطيور.... الي ربه الماعز البري! وأشهرهم عربيا الطفل الي لقيوه في الصحراء الي بين سوريا والعراق ربه الغزلان سنة ١٩٤٦. الثابت هنا إن الحيوانات كانت رحيمة جدا بالأطفال دول يمكن اكثر من البشر... وانه مهما قضوا الأطفال دول وقت في التأهيل النفسي إلا إنهم بيحنوا للحياة القديمة بعيدا عن البشر.

من أقدم القصص المكتوبة عن طفل نشأ في رعاية الحيوانات كانت قصة "حي بن يقظان" لابن الطفيل... بن يقظان الي بينشأ في جزيرة لوحده وبتربية معزة واحدة بتكون ليه مثابة الأم.... قصة ابن الطفيل مش قصة أطفال على الإطلاق أد ما هي قصة فلسفية عن علاقة الإنسان بالدنيا والدين!

في النهاية فيلم طرزان كان ناجح وستحقق المشاهدة لأنه بيدعم قيم التمسك بالأسرة والدفاع عنها.



16 - كوكو "Coco"

اذكريني



مش بتاع محمود ياسين!

عمل غاية في التعقيد بيتكلم عن علاقة الأحياء بالأموات من خلال الطفل ميجيل اللي بيحكي قصة جدته ايميلدا وكفاحها ك سنجل مازر بعد جوزها ما سابها هي وبتهم كوكو وسافر عشان يطارد حلمه بإنه يكون موسيقار

مشهور. بتكون النتيجة انه طبعا مبيرجعش وايميلدا بتكرهه وبتحرم الموسيقى على أي فرد في أسرته وبتشوف إن عملهم في صناعة الأحذية أفضل. الجينات بيبكون ليها رأي تاني وميجيل بيطلع مجنون بالموسيقى وكل هدفه في الحياة انه يعزف. وبيختار كرنفال يوم الأموات عشان يعرض فيه موهبته لكنه للأسف بيبكون خسر الجيتار بتاعه. بيقرر انه يسرق جيتار من قبر أشهر موسيقار في المكسيك وهو ارنستو والسرقة ده بتتسبب في المغامرة المثيرة اللي بيخوضها ميجيل في عالم الأموات.

الحقيقة إن الفيلم ده بتتخطى فيه بيكسار حاجر الترابط الأسري لمرحلة بر الموتى بشكل لم يتم الإشارة إليه في أي عمل درامي ولا ديني موجه على الرغم من الحث عليه في الأديان الثلاثة! في درس واضح وصريح إزاي إن الأعمال السينمائية ممكن فعلا ترتقي بالروح والفكر مش بس كلام و خلاص!

من الفيلم ده هنشوف شوية رسايل...

أولاً... و للمرة المليار اسمعوا لأولادكم حتى لو الي بيقلوه مش على

هواكم! مش طبعي أبدا ترسموا لهم حياتهم و مستقبلهم كله!

ثانياً... الستات تحديدًا غضبها و كرهها بيكون على أد حيا..... عشان

كده لو واحدة حبتك خاف فعلا لو كسرت قلبها!

ثالثاً... الشهرة ممكن تخلي الناس تفتكرك بالخير بعد موتك..... بس مش

هتمجي ذنوبك!

رابعاً... مافيش حاجة اسمها قضية تسقط بالتقادم! الحقيقة بتظهر و

الحق بيرجع لأصحابه و لو بعد حين.

خامساً... ما تنسوش الي ماتوا... انقلوا ذكراهم الطيب..... خلوا الناس

تدعي لهم و تتكلم عليهم بالخير... لان في اللحظة الي بتنساهم فيها بينتهي

ذكرهم في الدنيا و يينقطع عنهم حتى الدعاء.

سادساً... مهما كان الفراق مؤلم لكن فيه جانب مشرق..... كلنا على

الأرض زوار... مهما طالّت فتره إقامتنا هنفارق و نتجمع بالي راحوا قبلنا.

سابعاً... زي ما تذكروا الأموات اهتموا بالأحياء. عشان متندموش يوم ما

تمشوا إنكم سايبيهم من غير ذكريات معاهم.

ثامناً... مهما كنت متماسك مستحيل تشوف الفيلم ده و ما تفتكرش حد

عزيز عليك مات و تدمع " أو تعيط بهستيريا ". و انت بتفتكر جدتك أو

والدك أو أي حد قريب منك انقطعت سيرته من الدنيا عشان انت نسيته!



ادعوا لي بتحبوهم و اذكروهم بالخير... احكوا عن الحب و الأمان الي
حسيتوه معاهم عشان الي ما شافهمش في الدنيا يشوف تصرفاتهم و
يفتكرهم ولو غريب عنهم بالخير.

الفيلم من إنتاج عام ٢٠١٧ الطابع العام مكسيكي حتى في اختيارات
الكاست مثلا قام بدور ارنستو الممثل الأشهر بنجامين برات الأمريكي ذو

الأصل اللاتيني "قام بدور البطولة في فيلم **"cat woman"** وقام

بالإخراج لي اونكريش ذو الأصول اللاتينية "برضه" وهو ممثل صوت و منتج

ومخرج و عضو مجلس إدارة في شركة بيكسار.

في احتمالية لنزول جزء ثاني بس لسه مش مؤكدة.



و أخيرا و ليس آخر.....الكلام عن أفلام الأطفال أو الأفلام العائلية عموما
مستحيل ينتهي.... حاولت هنا أجيب الأفلام الي بتقدم قيم أو أفكار بشكل
مختلف... في أفلام كثيرة حلوة و ممكن نتكلم عنها بشكل مفصل قدام
شوية زي.....



١- "أعلى Up" أنتجته استوديوهات بيكسار سنة ٢٠٠٩... بيكسار

عملت دراسة عن عدد البالونات اللي تقدر تشيل بيت بالحجم اللي كان في الفيلم وطلعوا ٣ مليون بالونة! للأسف ما قدروش ينفذوا ال ٣ مليون بالونة في الفيلم! الفيلم اكر من رائع و مليان مشاعر مرهفة بس مشكلتي معاه انه ممكن يدي للأطفال انطباع انه سهل التعامل مع الأغراب و السفر معاهم!

2- "Shark Tale" حكاية قرش

من إنتاج شركة دريم ووركس سنة ٢٠٠٤ بيتكلم عن إزاي صعب انك تكون مختلف! نفس القصة اللي اتكلمنا عليها في فيلم "المرعبيين في الجامعة" المشكلة في الفيلم ده و على الرغم من إن عدد الأبطال اللي شاركوا فيه ضخم فعلا إلا انه كان في نقد بيتكلم عن ان الفيلم بيفتح عين الأطفال على اختلاف أضخم بكثير من اللي بيقوله الفيلم! يعني الموضوع اكبر من قرش نباتي عشان كده هومش الفيلم المفضل للأطفال.... لنفس الأسباب دي تم منع النسخة الحديثة من الجميلة و الوحش من العرض في روسيا و دول شرق آسيوية عشان كان فيه مشاهد بتدعم المثلية الجنسية " مشهدين صعب انك تلاحظهم بس ملاحظة الأطفال في الأمور دي بتبقى أقوى للأسف"



3- كونج فو باندا "Kung fu panda"

الجزء الأول خرج للنور سنة ٢٠٠٨ وكانت إنتاج شركة دريم ووركس...نفس قضية مش مهم شكلك المهم اللي تقدر تعمله وإزاي تحول عيوبك لمميزات و كلام كتير تحسه انه تنمية بشرية! بس الجميل في الفيلم ده انه ينقل زاوية تفضيل شخص على حساب الآخرين وإزاي ده ممكن يسبب فشله أو تدليه.... وبعدها بيكون الوضع أسوأ لي بيحي بعده!

4- أشباح عيد الميلاد "A Christmas Carol"

من إبداع تشارلز ديكنز خرجت واحدة من أفضل قصص الأطفال " والكبار على حد سواء " بتتكم عن شخص بخيل بتزوره ٣ أشباح.. شبح الماضي وشبح الحاضر وشبح المستقبل...الفيلم باختصار بيتكم عن ان ماضيك هو اللي بيرسم حاضرك ومستقبلك وإزاي محاوله إسعاد الآخرين هي حجر الأساس لإسعاد نفسك. مشكلة الفيلم ده انه تحسه بيوجه كلامه لأفراد دون غيرهم بسبب ارتباطه بعيد الميلاد! طبعا في نسخ كتير من الفيلم ده أفضلهم من حيث المتعة البصرية الفيلم اللي أنتجته ديزني سنة ٢٠٠٩ وكان بطولة جيم كاري.

5- وحدي في المنزل "Home Alone"

احذر ما تتمني... ده ممكن يتحقق!

ضغوط الحياة بتحول الآباء والأمهات لآلات حقيقية.... الحقيقة إنهم فعلا بيحبوا أولادهم فوق الوصف. أم كيفين سافرت ولايات في عربية مع ناس



أغراب عشان ما تسيبش ابنها لوحده. كيفين اتعلم كل مرة انه غالي عليهم... مشكلتي مع الفيلم ده محاولة الطفل اعتماده على نفسه من غير اللجوء للكبار أو للشرطة تحديدًا كنوع من الهرب من السلطة اللي فوق دماغه طول الوقت! الموضوع مش كوميدي للأسف! أول جزء من الفيلم ده خرج للنور سنة ١٩٩٠ وكان نجاحه ضخيم جدًا على مستوى الجماهير... اتعمل منه أربعة أجزاء لكن السلسلة إكلينيكية ماتت بعد ما كبر بطل الجزء الأول والتاني "ماكولي كولكين" وكان في صعوبة في استبداله.



6- المكروه " Despicable Me "

أي شخص ممكن يكون طيب مهما بدا شرير لو اتحط في موقف يشيل من على قلبه ترسبات الشر! مافيش إيهار في الفكرة للأسف لكن التنفيذ لطيف. الفيلم من إنتاج ٢٠١٠ ونزل منه بعدها جزئين كمان.

7- سلسلة أفلام هاري بوتر " Harry potter 2001- 2011 "

كوكتيل ممتع من السحرو الغرابة...قصة عن انتقال آني من الفقر واليتم للغنى والشهرة! رحلة كانت سبب في صناعة ظاهرة عالمية دست في نفوس الأطفال يعني إيه نضج قبل ما يكبروا! يعني إيه صداقة.... يعني إيه إخلاص... يعني إيه حب... يعني إيه أسرة....يعني إيه تضحية! كفاية قوي ان من أول جزء جت نصيحة دمبلدور انه "لازم تبقى شجاع عشان تقف في وش أعدائك... لكن لازمك شجاعة اكبر عشان تقف في وش أصدقائك لما يغلطوا!" ده غير طبعاً الجزء الأخير اللي فوقنا جميعاً " أطفال وكبار " على إننا بشر! كلنا رماديين! مافيش حد فينا ابيض أو اسود! مافيش ملايكة و شياطين! العدو ممكن يبقى مجبر أو ليه أسبابه أو بيحاول يساعدك وانت وجهة نظرك قاصرة مش شايف دوافعه!

8- رجال الين " Robots "

من إنتاج شركة بلوسكاي سنة ٢٠٠٥ الفيلم بيتكلم عن الروبوت الشاب اللي عنده حلم كبير انه يصبح مصلى لمشاكل الروبوتات لكن بيوقف في طريق



نجاحه شركة ضخمة قررت التخلص من أي آلة قديمة! أساس الفكرة هو الضعيف الموهوب الي يقف جنبه أصحابه لغاية ما يوصل لهدفه... فيلم حلوبس لا جديد!

9- لمنزل / الوطن "Home"

فيلم من إنتاج شركة دريم ووركس سنة ٢٠١٥ عن كائن فضائي يهرب من السلطة لأنه ارتكب مصيبة و بنت بتحاول توصل لأُمها في آخر بقاع الأرض....كالعادة نهاية الفيلم ان الوطن هو المكان الي فيه أسرته و أصحابك و الناس الي بتحيمهم!

1- "Rio"

من إنتاج شركة بلو سكاي سنة ٢٠١١ خرج الجزء الأول الي بيتكلم عن طائر غريب بعيد عن بيئته يرجع بيئته للتزاوج و بيلاقي صعوبة في حياة البرية الي هو مش متعود عليها...ده طبعاً بجانب مطاردة من الصيادين الي عايزين يحصلوا عليه عشان يبيعوه!

يعتبر فيلم آخر عن التوعية البيئية لكنه للأسف معروض بشكل فج شوية.... هو متعة بصرية بس ما اقدرش أقول بضمير مرتاح انه يصلح لمشاهدة الأطفال.

1- شجاعة "Brave"

من إنتاج شركة بيكسار سنة ٢٠١٢ الفيلم ده بيتكلم انك مستحيل تغير الآخرين.... لكن تقدر تاخذ شوية وقت انك تفهمهم و ده هيبقى أفضل!



الأم الي مش بتفكر غير ان بنتها لازم تتجوز "تحس انه فيلم عربي " والبنت الي مش شايفة الجواز هدف و الي بيتقدموا هي أفضل منهم كلهم. الصدام الي بيحصل و اللعنة الي بتنزل بسبب البنت الي عايزة أمها " تتغير " بدل ما تطلب إنها تفهمها!

الفكرة انه في النهاية الأم بتتغير فعلا..... لما بتفهم الأمور من زاوية ثانية غير الي هي شايفاه. و البنت كمان بتتفهم وجهه نظر أمها.... النصيحة الأساسية..... اسمعوا أولادكم و حاولوا تتفهموا إنهم مختلفين عنكم...جيل مختلف، عصر مختلف، و فكر مختلف...

..... والقائمة تطول ولا تنتهي.....




الفصل الثالث

عن الأعمال الي أصلها عربي و خرجت من الثقافة
بتاعتنا و تستحق إننا نعرفها....



1- علاء الدين و امصباح السحري

من قلب التراث العربي خرجت القصة دي للنور. لان ألف ليلة و ليلة مشهورة جدا عالميا فده خلى الغرب مال للتأثر بها و للنقل عنها.. عشان



كده يعتبر ان ده واحد من الأفلام المميزة فعلا قصة الفيلم عن الشاب الغلبان علاء الدين الي بيلاقي مصباح فيه جني بيحقق له أحلامه. طبعاً القصة متبقاش قصة من غير وجود صراع على قلب أميرة و هي الأميرة ياسمينه. بعد حرب علاء الدين عشان يفوز بقلب الأميرة ويتخلص من غريمه الشرير جعفر بيفوز علاء الدين و

بياخد الأميرة ياسمينه في جولة بالبساط السحري الطاير بتاعه!

القصة الأصلية عربية تماماً زي ما هو واضح. الفيلم أظهر الأميرة ياسمينه بالمتمردة الي بترفض جواز المصلحة " ويكأن ده حاجة واو و إبهار يعني و إضافة على القصة العربية " الطريف ان القصة العربية أصلاً برضه بتتكلم عن الأميرة الي شخصيتها قوية و هي الي بتوافق على علاء الدين دوناً عن بقية الخطاب " هي الي بتختاره يعني "

القصة الأصلية أكثر من رائعة بتكلم عن جني المصباح اللي حقق لعلاء الدين كل أحلامه. لكن لان اللي بيعي سهل يروح سهل، المصباح بيتسرق منه و بيخسر كل شيء... و بيكون عليه يشتغل بجهد عشان يستعيد المصباح.

الفيلم إنتاج ديزني سنة ١٩٩٢. و قام بالأداء الصوتي لدور الجني الرائع الراحل روبين ويليامز. في الإعادة الى بيتم الإعداد لها حاليا اشيع ان الممثلة المصرية ياسمين صبري قدمت للقيام بدور الاميره ياسمينه و اتقبلت إلا أنه تم التراجع عن القبول لأنها مابتعرفش تغني وجاري البحث عن ممثلة ثانية للدور.



2- حورية البحر الصغيرة

حورية البحر الي بتتمنى تصبح إنسانة. بتحب أمير وبتقدر بالسحر تتحول لإنسانة فعلا. بعد قصة حب بينها و بين الأمير بتقرر ترجع المحيط لأنها



بتكتشف انه في خطر على أصدقائها فيه. لكنها في النهاية بتتغلب على الصعاب لأنه- زي ما إحنا عارفين- الحب بيعمل المعجزات!

الفيلم من إنتاج شركة ديزني سنة ١٩٨٩ اتقال انه عن قصة دنماركية. الي يقولك كده قوله

انت حرامي في وشه! وقولها بثقة كمان!

على الرغم من ان حورية البحر موجودة في كل الثقافات القديمة على اختلاف مسمياتها، إلا أنها دايمًا من وجهة نظر البحارة كانت رمز الجمال الشديد و الخراب و الموت! يعني البحار الي كانت بتظهر له حورية البحر كان بيبقى عارف ان في عاصفة جاية و على الأرجح هو هيموت!

الثقافة الوحيدة التي عملت قصة حب بين عروسة البحر و البشر هي الثقافة العربية. أول ظهور لبحورية البحر كان في قصص ألف ليلة و ليلة التي كانت بفتح في الأسواق قبل ما تتجمع في مجلدات! أفضل نقل و تنفيذ لقصة عروسة البحر كانت في المسلسل الإذاعي " ألف ليلة و ليلة " التي اتكلم عن ان الأمير تخلى عن العرش عشان يتبع قلبه، و انه بالسحر قدر يبقى كائن بحري. اضطر يشتغل عشان يقدر يكون جدير ببحورية البحر التي حياها. و على الجانب الآخر كان في شق ثاني للقصة بيحكي عن أبوه الملك التي لف العالم وواجه المخاطر عشان يعرف أي خبر عن ابنه التي اختفى فجأة.

1. سندباد

المرة دي مكانش في أي محاولة لإخفاء حقيقة أصل القصة العربي لان الاسم

مفضوح بصراحة. فيلم السندباد

وأسطورة البحار السبعة بيحكي عن

مغامرات سندباد البحري اللي كلنا

عارفينها.

الفيلم من إنتاج شركة دريم ووركس

وتقديم ديزني سنة ٢٠٠٣ و كان فيه

نخبة من النجوم قاموا بالأداء

الصوتي على رأسهم براد بيت في دور

السندباد.

مره تانية حكايات السندباد موجودة بشكل أكثر إسهابا في ألف ليلة و ليلة

"المجلدات كمان"، اللي بتحكي عن عوالم بعضها مرعب وبعضها غريب

وبعضها فلسفي.... زي قصته في احد الرحلات مع الكائن اللي فضل راكب

على كتف سندباد و مستعبده لغاية ما سندباد قدر يخلص منه بالحيلة!

الفكرة دي نصا اتاخذت وكانت قوام واحد من أقوى أفلام الرعب الشرق

آسيوي!



2. علي بابا و الأربعين حرامي

المرّة دي فيلم عربي إنتاج مصري سنة ١٩٤٢. الفيلم الطريف بيقدّم بشكل



مبسّط قصّة علي بابا
البسيط اللي بيكتشف مغارة
فيها ٤٠ حرامي يسرقوا
وينقلوا لها اللي يسرقوه.
بيفتحوا المغارة بكلمة سر
وهي " افتح يا سمسم ". علي
بابا بيكتشف كلمة السر
وبتفتح له طاقة القدر.

طبعاً أنا ما ارشحش الفيلم ده للأطفال عموماً على الرغم من انه فيلم
لطيف فعلاً... لكن مشكلته ببساطه انه مافيهوش وازع أخلاقي... علي بابا
عشان فقير و لقي فلوس مسروقة يبقى الحظ ابتسم له.... على الرغم انه
المفروض ان السرقة سرقة حتى لو من حرامي!
بنفس الاسم خرج فيلم أجنبي إنتاج سنة ١٩٤٤... و برضه ما انصحش بيه
للمشاهدة العائلية!

3. بـلـر

آه هو أبو كف رقيق و صغير!

العمل ده تحديدًا وان كان مباشر جدًا إلا انه كان ممتع للغاية.... بيتكلم
عن الولد النوبي اليتيم اللي ليه مغامرات على أد سنة بيتعلم منها كثير و
اللي حوالية كمان بيتعلموا!



الأجزاء الأولى من بكار كانت فعلا
مسلية... ما انصحش بمشاهدة
الأجزاء اللي تم إنتاجها مؤخرًا.



4. حكايات خيال الظل

دا كان مسلسل بيتم عرضه على القناة الثانية الأرضية في التسعينات. الفكرة فيه بمنتهي البساطة انه حكايات من التراث بشكل لطيف ومناسب للأطفال.



مشكلته الوحيدة من وجهه نظري ان ممكن الأطفال حاليا ما يتقبلوهوش! التنفيذ القديم نوعا كان بيخليه أقرب لطريقة عرض الأراجوز بس بشكل أفضل!

بس فعلا يستحق المشاهدة.... ومتوفر على اليوتيوب.



5. مسرحيات عيد الطفولة.

أنا متفهمة انك ممكن تكون مصدوم من اللي بتقراه بس فعلا ده حقيقي!
فترة التمانينات والتسعينات كان بيتعمل كل عيد طفولة مسرحية موجهة
للأطفال، منها عن قصص أجنبية لكن فيها كتير من قصص عربية، و
تستحق تديها فرصة.

6. السيرة الهلالية...

على الرغم من الأفورة في الأداء و ضعف الإمكانيات الإنتاجية، إلا ان السيرة الهلالية بتظل من أفضل الأعمال التراثية الي فيها قيم كثير و دروس، و فوق كل ده مناسبة للمشاهدة العائلية.

7. علي الزبيق

قصة صراع للانتقام من الطفل علي الي ييفقد أبوه فيقرر ياخذ الحيلة
وسيلة عشان يرجع حقه.

على الرغم انه تربويا الكلام عن الانتقام بدل من التسامح والحيلة بدل
المصارحة غلط جدا إلا ان مغامرات الزبيق بتفضل العمل التراثي الوحيد
الي ممكن تتقبل فيه فكرة الغاية الي تبرر الوسيلة! خصوصا في حالة
الظلم البين و عدم القدرة على التظلم بشكل إنساني و حضاري!

8. ألف ليلة وليلة..

المسلسل الإذاعي مش المسلسلات التليفزيونية خالص!

لحسن الحظ ان حلقات ألف ليلة و ليلة في الإذاعة منقحة و مهندبة و معمول لها إعادة صياغة بشكل يخلها تناسب الأطفال والكبار.... الحلقة الواحدة حوالي ٢٠ دقيقة.. متوفرة الحلقات كاملة على اليوتيوب....لو سمعت مع أولادكم حلقة كل يوم قبل النوم

على الهامش....

للأسف مافيش أعمال كثير عربية و مصرية مقدمة خصيصا للطفل.... طبعا واضح إحنا فين والغرب فين.

- كثير من الأفلام المصرية القديمة اتعملت عن قصص من التراث أو من ألف ليلة و ليلة زي علي بابا و الأربعين حرامي و نور الدين و البحارة الثلاثة.

- من ضمن الأفلام القديمة الي مأخوذة عن التراث فيلم اسمه معروف الاسكافي...الفيلم مصري بيحكى عن معروف صانع الأحذية الي مراته بتنغص عليه حياته فيهرب منها لجزيرة بعيدة و هناك ينجح لغاية ما



أمير الجزيرة بغير من نجاحه فبيدور في ماضيه وبيعت يجيب له مراته
عشان تنكد عليه عيشته!

- أنا بصراحة مش قادرة استوعب ان القصة دي تحديدا كانت قصة
أطفال " فضلا عن إنها تتعمل فيلم عائلي يعني!" القصة ده فيها كل
معاني الخسة و الهروب من المسؤولية! ده طبعا غير الأمير المهزأ اللي
أقصى رد فعل ليه على غيرته من معروف انه بعت يجيب له مراته!
الفيلم إنتاج مصري سنة ١٩٤٧.

- في أعمال قيمة جدا مصرية كان بيتم إنتاجها في رمضان.. زي حكايات
الأنبياء " اللي كانت بالصلصال " و قصص الحيوان في القرآن
والأجزاء بتاعته " اللي قام ببطولة الأداء الصوتي لها النجم يحيى
الفخراي. الأعمال دي كانت قيمة و تنفيذها متميز فعلا لكنها تعتبر
أعمال دينية " نفس السبب اللي خلاني استبعد فيلم أشباح عيد
الميلاد"

- الدبلجة المصرية لأفلام ديزني و الإخراج بتاعها يخلينا نرفع القبعة
للمواهب المصرية اللي تستحق إنتاج خاص لأفلام انيمشين.....مش
ناقصنا لا الأفكار و لا الممثلين و لا المخرجين و لا المصممين و الله!
ناقصنا وعي من شركات الإنتاج ان ده منتج بييجيب ملايين " لو اتعمل
صح و اتوزع صح!"

- منحى الفهم لقواعد التربية بين أفراد المجتمع بيزيد لحسن
الحظ.....و منحى الاهتمام بأعمال الأطفال عموما تحت خط
الصفرا!



- اعرفوهم -

الأخوين جريم...



جايكوب و وليام جريم اتنين
اخوات باحثين و أكاديميين
ألمان قضوا وقت طويل من
عمرهم في البحث و التنقيب
عن القصص الشعبية عشان
يهذبوها و يجمعوها في كتاب

للأسرة كلها مش للأطفال بس... و سموا الجزء الأول من الكتاب
ده " حكايات الأطفال و أصحاب المنازل " الكلام ده في القرن
التاسع عشر... لولاهم كانت معظم الحكايات دي اندثرت.



والت ديزني

والتر ديزني " ١٩٠١ - ١٩٦٦ "



ده اللي بيطلق عليه
صانع البهجة فعلا....هو
رجل أعمال أمريكي صنع
شركة إنتاج ديزني وهو
رائد مجال الانيميشن في
العالم.

الصعود الحقيقي ليه بدأ سنة " ١٩٢٨ - ١٩٣٣ " الفترة دي اللي
خرج فيها للنور ميكي ماوس.....و بعدها توالى الشخصيات و
الأفلام اللي صنعت ذكريات أجيال

شركة بيكسار

البداية كانت سنة ١٩٧٩ بمجموعة مبرمجين قرروا يكونوا شركة بديلة



لشركة ديزني. الشركة
دي اللي مولها شركة
ابل اللي مؤسسها
ستيف جوبز فيما بعد
اشترى أسهم كثير في

شركة ديزني و أصبح اكبر حامل أسهم في تاريخ الشركة..... و من هنا
اختفت فكرة البديل و ظهرت فكرة التعاون.

شركة بيكسار لغاية السنة دي أنتجت ١٩ فيلم.... على الأفلام دي
فازت ب ١٦ جايزة أوسكار! و سبعة جولدن جلوب ده غير جوايز الإيمي
عن الأغاني اللي في الأفلام... و جوايز تانية كثير.



بيتر دوكتر

الشخصية الأكثر نجاحا على مستوى العالم!

آه! اتقال عليه كده فعلا!



الي ما يعرفش بيتر ده واحد من
المديرين التنفيذيين لشركة
بيكسار. بيتر وصل للمنصب
التنفيذي ده بس المكتب ما
منعوش من انه يكون مخرج...

انيماتور...منتج...كاتب سيناريو.... و مؤدي صوتي في انجح الأفلام
الي اتعملت في تاريخ الأفلام العائلية.

بيتر اترشح ل ٨ جوايز أوسكار فاز باتنين منهم بالفعل. أعماله
الأشهر هي

- Toy story 1,2
- Bugs life
- Monster inc, Monster University
- Wall-e
- Up

Inside out الي جت له الفكرة من التغيرات العجيبة الي بتمربها

بنته المراهقة، و قرر يبحث في الموضوع مع دكتور نفسي من جامعه
كاليفورنيا لغاية ما قدم سيناريو ميمرو اخرج الفيلم بشكل أهله للفوز
بالأوسكار.



منى أبو النصر " ١٩٥٢-٢٠٠٣ "

من القامات العالية في أعمال الأطفال. دكتورة منى درست الفنون

الجميلة وتخصصت في مطبوعات

الأطفال، الأمر اللي أهّلها انها تأسس شركة

كايرو كارتون للرسوم المتحركة اللي قدمت

لنا... بكار....رحلة السندباد البحري...سوبر

هنيدي.



محمد محمود شعبان " ١٩١٢ -

" ١٩٩٩

الإذاعي الأشهر المعروف ب بابا

شارو... بجانب حلقات الأطفال اللي

أخذ لقب بابا شارو منها اخرج ألف

حلقة من حلقات ألف ليلة و ليلة

الإذاعية. الراجل ده أعماله هتفضل عايشة للأبد في قلب و عقل كل

واحد سمع حلقات بابا شارو..... ده غير حلقات ألف ليلة و ليلة

طبعا.



دكتورة عائشة سليم

ممثلة صوتية ومخرجة وكاتبة حوارات... كانت المسؤولة بشكل أساسي عن معظم الأعمال التي تم دبلجتها للغة العربية من بداية دبلجة الأعمال سنة ١٩٩٧... وسابت ديزني كاركتر فويس انترناشونال سنة ٢٠٠٦. وهي حاليا شريكة ومديرة فنية في قسم الدبلجة لشركة مصر ميديا.



دبلجات

قامت الفنانة فاطمة مظهر " أخت الفنان احمد مظهر " بالأداء الصوتي لأول فيلم لديزني يتم دبلجته و عرضه مدبلج و هو فيلم " سنو وايت " إنتاج سنة ١٩٧٥. في حين قدم الفنان الرائع الراحل عبد الوارث عسر دور الراوي والمرأة المسحورة.

استطاعت الفنانة عبلة كامل قلب موازين الحياة بالنسبة لكل من شاهد فيلم البحث عن نيمو بصوتها المميز في عوم و اتمخض عوم و اتمخض... و اللي شاف الفيلم المدبلج مستحيل يقتنع بالمذبةعة ألان في نفس دور دوري على الرغم ان ألان أدت الدور قبل عبلة كامل ما تقوم بالدبلجة!

الفنان هشام نور أطلق اليوم غنائي اسمه قلب شجاع بعد ما كتير من الناس طلبوا منه ده خصوصا لتعلقهم بصوته اللي سمعوه في أغاني فيلم طرزان... سيمبا " الملك الأسد"، احذب النوتردام، علاء الدين و هرقل. ده بجانب الأداء الصوتي لدور سيمبا في الجزء الأول و الثاني للفيلم وفي دور لينج في مولان الجزء الأول و الثاني.

لو حبيت شلي سوليفان يبقى انت دورت و عرفت انه هو الفنان سامي مغاوري. الصوت المميز و اللي نجح مع الفنان محمد هنيدي في تقديم نسخة مميزة من دبلجة شركة المرعبين المحدودة. يتميز



الفنان سامي مغاوري عن غيره برفضه لأفلام من وجهة نظره غير مناسبة للأطفال أو بترزع أفكار غلط. و ده نوع نادر من الوعي صعب نلاقيه دلوقت للأسف.

الفنان سامي مغاوري قدم دور شريك في الثلاثية المدبلجة لكنها باللغة العربية الفصحى اللي أدت الفيلم هيبة لا تتناسب مع طبيعة الأفلام الكارتون اللي لازم تكون خفيفة.... و بالعامة المصرية!

الفنانة لقاء الخميسي قدمت ارق أداء صوتي ممكن يتقدم لدور بيل في الجميلة و الوحش. في حين ان الأغاني كانت من نصيب صاحبة الصوت الرائع دعاء فاروق. و شارك الفنان ماجد الكدواني في نفس الفيلم بدور المنبه أو زمان في حين قام الممثل فراس سعيد بدور الوحش.

من ضمن أفضل من لمع اسمهم في مجال كتابة السيناريوهات المدبلجة هو الراحل عبد الرحمن شوقي اللي بدأ مسيرة الدبلجة بفيلم الأسد الملك وتوالت أعماله. عبد الرحمن هو بالمناسبة كاتب فوازير فطوطة.



المخرج الرائع عصام السيد كان من أوائل الناس اللي عملوا طفرة
في إخراج أعمال ديزني المدبلجة بعد الإخراج الأكثر من رائع لفيلم
الأسد الملك. بعدها استعانت بيه ديزني بالمصري في إنتاج حكاية
لعبة وهرقل وغيرهم....

و القائمة تطول..... و الحكايات لن تنتهي.



الخاتمة

مش عارفة إزاي اقدر انهي كتاب زي ده. الحقيقة مش عارفة إزاي بدأته أصلا! الأعمال الموجهة لأطفالنا عليها عامل كبير و أحيانا بتبث أفكار غاية في الخطورة لازم ننتبه ليها.

في نفس الوقت ما نقدرش ننكر إننا جميعا بنستمتع بالأعمال دي أيا كانت ثقافتها أو مرجعها. كلنا خفنا على نيمو وزعلنا على سيمبا و شفنا نفسنا - أحيانا - في شريك أو وودي أو بيتر بان! مهما حصل هتفضل الأعمال دي تثير شغفنا و ترسم ابتسامة طفولية على وشنا.... أو تنجح في إنها تنزل دمعة تأثر و تزرع جوانا حاجة.

هتفضل الأعمال دائما و أبدا لينا كلنا..... مش للأطفال و بس.



الكاتبة نسمة عاطف صدرت لها أعمال سابقة

الانتقام طبق يقدم بارادا ٢٠١٦

رواية العائلة ٢٠١٧

رواية عمارة ٢٠١٨

للتواصل مع الكاتبة من خلال الفيسبوك

<https://www.facebook.com/nesma.atf.144>



للتنشر والتوزيع

